

Sámis

Sámi čálakultuvrralaš áigečála • Nr. 13 Miessemánnu 2013 **NUVTTÁ**



Sáme giella

Ovdal ja dál



**LEAT GO SÁMEDIKKIT
DUOHTA SÁMIID
OVDDASTEADDJI
ÁSAHUSAT?**

JOHN T. SOLBAKK



**NUPPI SÁTNEGIRJJIS
NUPPI SÁTNEGIRJÁI**

MIKAEL SVONNI



**SÁMEGIELLA OVDAL JA
DÁL – JA MANIN LEA
DÁRBU SIRDIT SÁMI
SÁTNEGIRJIID NEHTTII**

HARALD GASKI



**GIELLAJÁPMIN-
DIAGNOSAT JA
"MANIMUŠ GIELLA-
HÁLLIID" OHCAN**

ELISABETH SCHELLER



**STUORÁTGIELAT
BÁIDNET UNNIT-
GIELAID – NAPPA
NUPPI GUVLUI?**

JOVNNA GUTTORM SOLBAKK



**SÁNIID FÁPMU JIERPMI
BADJEL**

INGER ZACHRISSON



Giellajahki 2013

Dál lea jo 2013 jorramin giđđadálvvi guvlui. Beaivvit leat čuvggodan ja českes muohtagovčas hásttuha meahccái dollet. Sámi giellabarggut ja giela ovddideapmi maid čuvvot iešguđet rávnnjiid. Norggas lea 2013 nationála giellajahki, Norgga gielladutki ja dik-tára Ivar Aasen 200 lagi ávvudeami oktavuođas. Buot gielat Norggas galget ávvuduvvot. Mánngalágan doaimmat leat plánejuvvon, omd. girjerádjosiin ja mu-sihkka- ja teáhterbarggu hárrái.

In dieđe vel leat go sierra plánat das mo sámeigella galgá ávvuduvvot. SFS lágida seminára beaivvi ovdal jahkečoahkkima, mii dollojuvvo Kirkonjárggas miessemánu 25. b. Semináras čalmmustahtit sámeigela almmolaš dili. Norgga Sámediggi ovddidii 2012 loahpageahčen Diedáhusa sámeigela birra, mainna Sámediggi áigu ovddidit bajimus dásí politihka sámeigela birra. Diedáhusa oktavuođas sáhttá omd. jearrat mii dáhpáhuvvá jos Sámediggi mearrida heittihit otná sámi giellahálddašanguovllu -ortnega, vai buohkat Norggas oččośedje seammá vuogatvuodaid geavahit ja oahppat sámeigela. Gielddat ja suohkanat mat odne gullet hálddašanguvlu, šattaśedje resursagieldan. Jearaldat dás lea, maid rievtti mielde máksá šaddat resursagieldan? Dát livčii dehálaš ášši SFS miellahtuide, ja sávan mis šaddá buorre ságastallan dán ášši birra. Sámeigela ovddideapmi ja vuogatvuodat ja geatnegasvuodat mat dasa čatnasit, ain dagahit stuorra digaštallamiid servodagas. Dán oaidná omd. Tromssa suohkanis, mas evttohuvvón ovttasbargo-šehtadus gaskal Sámedikki ja Tromssa suohkana sáhttá gomihit olles posiuvnna ovttasbarggu. Oažžu roahkka dadjat, ahte min gollegiella buktá feara mak-kár ge hástalusaid, oaiviliid ja dovdduid.

Giellajagi oktavuođas áigu min searvi maiddái ávvudit sámeigela, ovdanbuktit árbevirolaš gulahallanvugiid ja ságastallat somás, rikkis ja buori giellageavaheami. Dán oassái illudan mun erenoamážit, go SFS miellah-

tut leat hui giellačeahpit ja sis leat ollu iešguđet lágan vásáhusat ja mualusat maid birra sáhttet mualit. Nu mo mun jo loahpahin ovddit Sámis nummára SFS-čiega, de lea giellaárvu dat mii dahká ahte mii leat válljen bargat sámeigela ovddidemiin, cálalaččat ja njálmmálaččat, cállin, oahpaheaddjin, akademihkarin ja kulturbargin.

Namuhan vuot SFSa Facebook siiddu. Dat ii leat vuos nu ollu geavahuvvón, muhko ávžžuhan áinnas dasa buktit ságaid, commenteret áššiid, čujuhit ođđasiidda ja eará miellagiddevaš ja somás áššiide! Ferten maid namuhit ahte šaddá miellagiddevaš oaidnit makkár doaimmaid Sámi giellagáldu – Davviriikkalaš sámeigela fága- ja resursaguovddáš, man Sámi palamentáralaš ráđđi lea vuodđudeamen, dađistaga čađaha.

Áiggun dás loahpageahčen namuhit gielalaš illuságaid: Logan Giellajagi almmuhanmildosis nuorra Oslo nieidda birra Anna Lanto, gii njealje jagi áigi mearridii oahppat sámeigela, giela man su áhči ii beassan oahppat. Son lea oainnat bajásšaddan Stovneris Groruddalenis, gos ii lean, nu mo dadjá, "čáffa leat dábálaš norgalaš, gii ii máhte nuppi giela, iige dovdda nuppi kultuvrra". Sámeigellohkan lea earret eará dahkan dan ahte son lea álgán ávvudit Sámi álbmotbeaivvi, juoga maid son ii láven ovdal go lohkagođii sámeigela. Son lea maid beassan gierdat ahte earát leat čavggahan su, muhko son joatká dainna lágiin sámevuđa čalmmustahtit, ja lea velá movttiidahttán iežas áhči sámeigela lohkat. Seammá mildosis deattuha maiddái Sámedikki ráđđelahttu Ellinor Marita Jåma ahte mii fertet rihkkut siskkáldas giellajustiisa sámi servodagas, eambbo geavahit dan sámeigela maid máhttit, ealáskahttin dihte giela. Dát leat ovdamearkkat mo olbmot konstruktivva láhkai leat ovddideamen giellamáhtu ja dan árvvu, ja leat geahččamin ovddosguvlui.

Sávan buohkaide buori giellajagi!

Lill Tove Fredriksen, SFS ovdaołmmoš

SÁMIS Nr. 13

Miessemánnu 2013

Sámi čálakultuvrralaš áigečála,
man CálliidLágádus almmuha
Sámi fágagirjjálaš čálliid- ja jorga-
leaddjiidsearvi ovdas.

ISSN 0809-7410

Doaimmahus

Harald Gaski ja John T. Solbakk

Ruhtadeaddjít

Norgga Sámediggi, CálliidLágádus
vuodđudus ja SFS Sámi fágagirjjálaš
foanda.

Sámis artihkkaliid ja govaid ii oaččo
almmuheaddji, čálli dahje govvi-
deaddji lobihaga mánget.

Gráfalaš bargu Minna Saastamoinen,
Studio Borga, Ohcejohka

Deaddilan Waasa Graphics Oy, Vaasa

SFS

Sámi fágagirjjálaš čálliid- ja
jorgaleaddjiid searvi stívrä

Ovdaolmmoš Lill Tove Fredriksen
Grøholtvn. 5, 9010 Tromsø

Stívalahttu Seija Guttorm
9730 Kárášjohka

Stívalahttu Trond Are Anti
Buolbmát, 9845 Deatnu

Sadjášaččat
Elisabeth Utši Gaup
9520 Guovdageaidn

Elen Ragnhild Sara
9730 Kárášjohka

John Henrik Eira
9730 Kárášjohka

Cállingoddí
Jodíheaddji Svein Nordsletta
Fitnodatgeaidnú 13, Pb 140,
NO-9735 Kárášjohka
Tel. +47 78 46 83 30,
+47 416 45 751
Faksa +47 78 46 83 29
E-poosta: samifaga@samifaga.org

Sámis lea nuvttá. Dán sáhttá maid
dingot almmuheaddji neahtagirje-
gávppis

www.calliidlagadus.org

Sámis artihkkaliid sáhttá maiddái
lohat dás:

www.samifaga.org

Dearvvuodat doaimmahuas!

DÁN JAGI LEA sihke giellajahki ja válgajahki. Dán nummiris iskat fuomá-
šahttit goappašiid áššiid, vaikko áigečállagis mii ilbmá guktii jahkái ii
leat nu álki politihka birra cállit. li fal dan dihtii ahte giella ge lea nu okta-
geardánis ášši, muhto politihkka gáibida beaivválaš čuovvuma ja joh-
tilis vástádusaid ja kommentáraid, nugo áviissain, radios ja TVs sáhttá
addit. Áigečállagis baicce lea dábálaš ohcat guhkit linjáid ja árvvoštallat
man guvlu áššit orrot johtimin. *Sámis* lea dássážii vuosttažettiin deattu-
han kulturpolitihka, muhto dán nummiris mii viggat oaivvildallat maiddá
bellodatpolitihka hárrai. Duogážin dieđusge lea eaktu ahte Sámediggi
lea jurddašuvvon sápmelaččaid jietnan ja ovddasteaddjin. Sápmelaččat
geat leat dáža bellodagain lahttun, leat danan go sii dorjot dan bello-
daga áigumušaid. li ovttage Norgga riikkabellodagas leat sámepolitihkka
váldoáššin, de go omd. Norgga dálá stáhtaministtar cealká ahte Bargiid-
bellodat áigu vuositit Sámediggeválgga, de son oaivvilda *Norgga* bargiid-
bellodaga, danin go mis ii gávdno Sámi bargiidbellodat. Bellodagaid
siskkobealde gis lea nu ahte eanetlohku mearrida, de vaikko bellodaga
sámi áirasat livčé eará oaivilis, de loahpalaččat goittotge eanetlogu mear-
rádus vuotá. Sámi retorihkas lea olu sáhka sámi ásahusaid birra, man
dehálaš lea daid nannet. Juste dan dihtii dáidá ge buot dehálemos jear-
rat ja suokkardallat ahte leat go duođaid sápmelaččat ieža geat mearridit
min váldo sámi ásahusa siskkobealde, vai leat go dáža bellodagat mat
bidjet eavttuid. Guhkebuš, ákkastalli artihkkalat leat áigečállaga dovdo-
mearka, ja moai doivo ahte Sámis-čállosat sohpét dan meroštallamii, go
áigečállaga viggamuš livčii doalahit ságastallama jođus miellagiddevaš
čállosiiguin mat buktet ovdan iešguđetge beliid min árgabeaivvis, seam-
más go jerret ahte lea go buoridanmunni gokkoge.

John T. Solbakk ja Harald Gaski



NJUNUŠČÁLLOSAT

- 2** SFS čiehka
Lill Tove Fredriksen

- 3** Dearvvuodđat doaimmahusas!
Harald Gaski ja John T. Solbakk

ARTIHKKALAT

- 6** Leat go Sámedikkit duohtha sámiid
ovddasteaddji ásahusat?
John T. Solbakk

- 12** Nuppi sátnegirjjis nuppi sátnegirjái
Mikael Svonni

- 20** Ovdal ja dál Ja manin lea dárbu
sirdit sámi sátnegirjiid nehttii
Harald Gaski

- 24** Mimi Bahl De Leon
Ellen Marie Jensen

- 30** BÁIKI riikkaidgaskasaš sámi
áigecála Harald Gaski

- 32** Buorre eallin ja dan dutkan
Harald Gaski

- 34** Giellajápmindiagnosat ja
"maŋimuš giellaħálliid" ohcan
Elisabeth Scheller

- 40** Sániid fápmu jierpmi badjel
Inger Zachrisson

- 42** Stuorátgielat báidnet unnitgielaid
– nappa nuppi guvlui?
Jovnna Guttorm Solbakk

- 47** Garra-Jorta – Guovdageainnu
báhppa 1774–1780
Aage Solbakk

- 50** Govvamuittut
Aage Solbakk

KOSERIIJAT

- 56** Mun in gille lohkat
Wenche Marie Hætta



SFS/sámi

fágagirjjálaš stipeanddat 2013

Sámi fágagirjjálaš foanda almmuha dán jagi čuovvovaš stipeanddaid sámi fágagirjjálaš čálliide ja jorgalead-djiide:

- 1) 1 prošeaktastipeanda, dokumentára girjái giehtačálus, NOK 100 000.-
- 2) 4 mátkestipeandda, stipeandda árvu gitta NOK 20 000.- rádjai
- 3) 4 fágalaš artihkkaliid jorgalan/heivehan stipeanddat, gitta NOK 10.000,- rádjai
- 4) 5 árvvoštallanstipeanda, árvvoštallat sámi oahpponeavvuid ja dokumentáragirjiiid, á NOK 5.000.-

Dát gusto stipeanddaide:

- 1) Ohcamii galgá ráhkadir dievaslaš prošeaktačilgehusa, ja áinnas duođaštus girjegoastti-deaddjis ahte dat áiggošii ruhtadir ja almmuhit giehtačállosa go dat lea gárvvis.
Foanddastivra vuoruha prošeavtaid/giehtačállosiid main fargga sáhttá ilbmat sáme-gielat girji dahje eará fágagirjjálaš teaksta. Prošeaktastipeandda sáhttá maiddái geavahit lassiruhtadeapmin. Ohcci galgá muđuid ge almmuhit ohcamušas jos prošektii lea ohcan dahje ohcamin doarjaga eará ruhtadeaddjiin. Sii geat ovdal leat ožon stipeandda, eai sáhte ohcat ovdal dohkálaš raporta lea sáddejuvvon foandda stivrii. Foanda ii ruhtat diedalaš dutkosiid gárvistit, ii ge girjiiid deaddilangoluid.
Váilevaš dieđut dahket ahte ohcan ii meannuduvvo. Foanddastivra sáhttá hilgut buot ohcamiid, jos gávnnaha ahte ohcan omd. ii duhtat Fágagirjjálaš foandda ulbiliid.

Juolluduvvon ruhta mákso guovtti oasis, bealli go álgá prošeavttain, ja nubbi bealli go lea loahpahan prošeavta, ja giehtačálus gárvvis. Jos eai leat dohkálaš prošeaktaohtamat, de sáhttet juolluduvvot eambbo mätkestipeanddat.

- 2) Mátkestipeandda lea fágalaš mätkki várás. Vuostáiváldi galgá reporteret stivrii go mätki lea čadahuvvon, ja das galgá buvttaduvvot 5 siidosaš teaksta man sáhttá almmuhit Sámis áigečállagis.
- 3) Jorgalanstipeanda lea eará gielain jorgalit sáme-gillii. Artihkkala galgá sáhttit almmuhit Sámis áigečállagis. Juolluduvvon ruhta mákso go artihkal lea jorgaluvvon, boahztán čállingoddái ja dohkkehuvvon.
- 4) Oahpponeavvu dahje dokumentára girjji árvvoštallan galgá leat 3-5 siidosaš, ja sáhttit almmuhuvvot Sámis áigečállagis. Dan oažtu maŋná fállat eará almmuheaddjái. Juolluduvvon ruhta mákso go árvvoštallan lea gárvvis, boahztán čállingoddái ja dohkkehuvvon.

FUOBMÁ! Ohcanáigemearri 21.6.2013!

Eambbo dieđut SFS:a čállingottis, tel. 416 45 751 Svein, tel. 915 90 606 John T.

Vuođuštuvvon ohcan oktan ruhtadanplánain sádde ovdal geassemánu 20. b. 2013 čujuhussii

SFS/Sámi fágagirjjálaš foanda
Fitnodatgeaidnu 13,
Pb 140, NO-9735 Kárášjohka

dahje sádde e-poastačujuhussii
samifaga@samifaga.org

Leat go Sámedikkit duohta sámiid ovddasteaddji ásahusat?

20. Sámekonfereansa Murmánskkas miessemánu 2.–4. b. dán lagi hásttii mu ságastallat dien gažaldaga birra mii dás lea bajilčálan. Duogážin gažaldahkii lei dat go dáža riikkadási politikhkalaš bellodagat oassálastet Sámediggeválggain, ja leat ge ovddastuvvon Norgga Sámedikkis bellodagaid sápmelaš áirasiiguin. Dáinna čálloisiin lean viiddidan ja čieknjudan namahuvvon oanehis ságastallama.

Suoma ja ruota bealde ii leat diet relevánta gažaldat, go doppe eai leat suoma ja ruota riikkabellodagat mielde sámediggeválggain. Duše dáža bealde. Ruosša bealde ii leat riikka lágaid bokte ásahuvvon sierra Sámediggi. Guoládaga sápmelačcat leat vuos ásahan oktasáš guovddáš ásahusa mii galgashii ovddastit buot ruosša beale sápmelačaid. Ásahusa sii gohčodit gielddasáme-

gillii Kuelnegk Nuark Sam Sobbar (Guoládatnjárgga Sámi Soppar). "Sobbar" várra lea luoikkassátni ruoššagielas, norraz dahje norröös lea nuortalaččaid doaba. Dat lei dološ sámi siiddain sin bajimuš mearrideaddji ásahus. Dán birra sáhtát lohkat ee. dás: Sámit áiggiid čáđa 1, ČálliidLágádus 2011, s. 99–104.

Hárdá go gažaldat eambbo go hástala?

Lea dieđusge nu ahte diet gažaldat ii dušše hástal, muhito hárdá sápmelaččaid geat sámediggeválggain dorvusat dáža bellodagaide. Dáža bellodagaid sámi jienasteaddjít ja válljejuvvon sámediggeáirasat leat gullon fástidea-men gažaldagain go nie jearrá, ahte eai go sin dalle ane duohta sápmelažjan go ásahit válgalisttaid dáža bellodagaid namas? Stuorra oassi jienasteaddjjin han jienastit dáža bellodagaid. Ii addo das leat gal jearaldat, lea mu fástádus. Munnje lea deháleappot čielggadit man-

ne jienastuslogu sápmelaččat jienastit nu mo dahket. Dásá mis ain váílu "válgadutkan". Nu lei ge mu Murmánskka ságastallama vuolggasadj, ja lea ain, dat ahte fástádus dien bajilčállaga gažaldahkii ii leat nu álki go *jo* dahje *ii*. Dasto fuomášahtten ságastallamis dan ahte "bellodat-sápmelaččas" goit lea gažaldahkii eará fástádus go sus gii ii leat bellodatmiellahttu. Mu bargun ii leat ášsis leat duopmárin, baicce čájehit ee. válga-bohtosiid statistihkaiguin mo dahje geaid mii jienastat. Dasto čuovvu gažaldat manne mii jienastat nu mo dahkat, ja dasa ge leat moanat fástádusat. Mun jearan gažaldagaid, ja doaivvun guldaleaddji (dahje dál lohkki) ieš jurddašišgoahtá vejolaš fástádusaid.

Sámedikki jienastuslohkku

Mun fuomášahtán dan ahte politikhalaš válggaid oktavuođas diedusge earuhat du sámi identitehta, du čearddalaš gullevašvuođa, das makkár politikhalaš váljema don dagat. Du identitehta ii leat mearrideaddjin dasa makkár politikhalaš ideologijii dus lea jáhkku. Okta mii dan fuomášahttá lea Sámedikki jienastuslohkku, mii addá jienastanlobi sámediggeválggain buohkai-de geat dasa leat čálihan iežaset mearriduvvon eavttuid vuođul. Čáliheami eavttut leat –

"Buohkat geat addet dovddastusa dasa ahte atná iežas sápmelažjan, ja geas

- a. lea sámegiella ruovttugiellan, dahje
- b. lea leamaš vánhen, vánhen-vánhen, dahje mät-tarvánhen geas sámegiella lei ruovttugiella, dahje
- c. lea su mánná gii lea dahje lea leamaš Sámedikki jienastuslogus, sáhttá gáibidit čálihuvvot Sámedikki jienastuslohkui."

Jienastuslohkku ii earut ideologijiaid gaskkas ii ge njuolggat das makkár politikhalaš áigumuša jienasteaddji galgá válljet. Dan dahket easkka dat geat de gilvalit válggaid bokte oažzut fámu mii lea addojuvvon Sámediggái. Jienastuslogu olbmot sáhttet vel organiseret dahje jienastit heaitthihit dan seamma Sámedikki. Nu mo jo goit okta dáža politikhalaš bellodat áiggošii, ja lea ge sin sápmelaš ovddasteaddjiid sádden Sámediggái dakkár prográmmain. Aiddo dán ja Sámediggeásahusa oktavuođas lea mu mielas dehálaš ja riektta čilget ahte lea dáža politikhalaš bellodat mii lea mearridan sii áigot heaitthihit Sámedikki, ja ahte dát bello-dat dáinna áigumušain lea ovddastuvvon Sámedikkis. Eai ge sin sápmelaš ovddasteaddjit dárbaš leat "un-nit" sápmelaččat dan dihtii, muhto baicce leat eamiálbmot politikhalaš perspektiivvas "láhppon", leat goit hil-gon dan maid mii dadjat lea dehálaš caggi eamiálbmot-ideologijias, namalassii iešmearrideapmi.

Manne Sámediggi?

Dehálaš gažaldat lea dalle dat ahte manne bat Norgga Stuorradiggi mearridii Sámelága 1987s man vuodul ásahii Sámedikki 1989s? Ii go dat lean ge fástadussan sámi organisašuvnnaid gáibádussii ahte mis galggai lean iežamet álbmotválljejuvvon ásahus, mii soabadettiin Norgga stáhta eiseválddiin dađistaga galgá áimmahuššat sámi iešmearrideami? Nu han lei ge, doaivvun mun.

Ovdal go láhka mearriduvvui, gáibidedje sámi organisašuvnnat – NSR erenoamážit, ahte Stuorradiggi galggai lága bokte mearridit ahte dušše sámi joavkkut, eai ge dáža bellodagat, galge beassat oassálastit sámedigge-válggain. Dan ii čuovvolan Stuorradiggi. NSR dohkehii dan, ja cájehii dan go oassálastigodii sámedigge-válggai. NSRa organisašuvnnas dáide dalle oaivvildan dan ahte eai han dáža bellodagain lean olbmot geat riikkaviidosáčcat sáhtte gilvalit sámi joavkuiguin, ee. NSRain, mii jo lei organisašuvdna mas ledje báikkálaš searvvit miehtá Norgga. Dahje sáhtte maid NSRas muhtimat jurddašan ahte eai gilvaleaddjit várra jolggat boahit válggai dáža bellodagaid namas.

Norgga Bargiidbellodat gilvala

Dušše Bargiidbellodat/Arbeiderpartiet lea álggu rájes leamaš gilvaleaddjin NSRii ja sámi joavkuide. Bellodat ceggii válgalisttaid buot biirriin, earret Mátta-Sámis. Bellodat oačui 7 áirasa, 7 válgbiriress, NSR fas 24 áirasa, ja eará sámi joavkkut 8. Easkka nuppi válggas lei Olges/Høyre ja Guovddášbellodat/Senterpartiet mielde muhtin válgbiriini. Gáldu: Odd Mathis Hætta: *Sametinget i navn og tall 1994*. Odne dadjat buot dáža bellodagat bidjet válgalisttaid sámedigge-válggai.

Manne dáža bellodagat

Lea vejolaš čujuhit muhtin sivaide manne dáža bellodagat vulge mielde sámedigge-válggai, oanehaččat ee.:

- 1987 Sámeláhka ii hehtte dáža bellodagaid oassálastimis sámedigge-válggain
- NSR mearridii organisašuvnnain oassálastit válggai
- Muhtin gievrras NSR olbmot guđđe searvvi ja mannet sin dáža bellodahkii
- Eai lean goit álggus galle molssaeavttu sidjiide geat eai lean NSRii gullevaččat
- "Bellodat-sápmelaččat" mearridit geavahit iežaset báikkálaš dáža bellodaga
- Stuorra dáža politihkalaš bellodatororganisašuvdna sáhttá leat sihke ekonomalaš ja organisašuvnnalaš doarjian
- Dáža bellodaga gullevašvuhta addá politihkalaš karieravejolašvuoda mii manná dobbelii go Sámediggi

Go dát ii leat guorahallojuvvon, dahje dutkojuvvon, de mii oažžut árvádallat fástadusa gažaldahkii manne dáža bellodagat sámedigge-válggain. Ii sáhte goit dadjat ahte lea dušše okta sivva, muhto olles ráidu sivat. Muituhan, ja fuomášahtán sin geat eai lean 80-jagiin mielde servodatdigaštallamiin: Áigá ovdal vuosttas válggaid digaštallui ee. dat ahte galggai go NSR oassálastit válggai. Ollugat atne NSRa vuosttamaužžan kulturorganisašuvdnan, ja dan sivas ii heiven searvvi nama seaguhit válggai. NSRas han ledje miellahtun maiddái sápmelaččat geain lei lahka gullevašvuhta báikkálaš dáža bellodagaide, maid bokte oassálaste ee. gielldaválggain. NSRa meannudii guovtte

riikkačoahkkimis ovdal vuosttas sámediggeválga gažaldaga galggai go organisašuvdna cegget válgalisttaid. Eanaš "finnmárku sápmelačat" ledje vuostá, muhto riikkačoahkkima eanetlohu dáhtui geavahit Riikkaorganisašvnna, ja nu šattai. Vuosttas válgaid bohtosat orro goit čujuheamen dasa ahte lei rivttes mearrádus. Vuosttas áigodagaid stivrii NSR ja dan ovtasbargojoavkkut Sámedikki.

Sámi sosialdemokráhtat ja Sámi borgárat

Sápmelaš sosialisttat ja sosialdemokráhtat, olbmot geat gieldda- ja stuorradiggeválggain jienastedje Bargiidbellogada ja Sosialisttalaš Gurutbellogada, digaštalle vejolašvuoda cegget Sámi sosialdemokráhtalaš lista vuosttas sámediggeválgi. Dát livčii dalle válgalista mii livčii vuodđuduuvvon Norgga ja oarjemáilmni ideologijiaid vuodul, muhto dat ii galgan lean ovttage dáža bellodaga vuollasaš joavku. Dán digaštallama mun dovddan bures, go mun ge atnen iežan ideologálačat sosialistan, muhto in lean makkár ge dáža bellodaga miellahtun. Sámi sosialdemokráhtaid organiseren bázii dalle dušše jurddan.

Norgga Bargiidbellogada báikkalaš bellodagaid sápmelačat ceggejedje de dáža bellodaga namas válgalisttaid. Dáid sápmelačaid gaskkas ledje maiddái muittimat sis geat guđđe NSR aiddo dan sivas go organisašuvdna mearridii cegget válgalisttaid NSR namas. Vuosttas válgaabohitosat čájehedje ahte ledje ollu sápmelaš jienasteaddjít geat válljejedje dáža bellodaga man sii juo jienastedje gieldda- ja stuorradiggeválggain. Dán oaidná erenoamáit válgaabohosiin Finnmárkkus. Norg-

ga bargiidbellogada sápmelačat leat de ásahan bellodahkii "Samisk sosialdemokratisk forum" – Sámi sosialdemokráhtalaš forum.

Dáža, dahje norgga politihkalaš gova mielde lei olgeš bealli ge mielde vuosttas válggain. Bellodat Høyre/Olgeš ceggi válgalistta muhtin válgabiirriin, muhto ii juksan ovttage áirasa. Eambbo miellagiddevaš lea dat ahte guovtte válgabiirres, Davvi Romssa ja Mátta-Romssa válgabiirres, lei "Sámi borgár lista" mielde válgas. Eai dát ge lihkostuvvan. Odne sii eai šat oidno, ja dáidá leat Høyre/Olgeš odne sin bellodat sámediggeválggain.

Geaid mii jienastat

Válgaide oassálastin ja válgaabohitosat vuosttas válggá rájes 1989 oktan majemuš válggain mii lei 2009, lea miellagiddevaš lohkamuš, ja maiddái fástádus dasa jos sámi organisašuvnnat 25 lagi dás ovdal doivo sii galge stivrret Sámedikki bistevačat. Čuovvovaš tabeallas leat guokte vuosttas ja guokte majemuš válggaa. Dás lean bidjan buot sámi joavkkuid jienaid oktii, ja seamma lean dahkan dáža bellodagaid jienaguin. Statistikka muitala ahte masá bealli sámediggeválga jienasteaddjiin jienastit dáža bellodaga. Gáldun leat almmolaš statistikat:

Válgaossálastit	1989	1993	2005	2009
Jienastedje	4.134/ 77,8%	5.389/ 77,7%	8.928/ 72,6%	9.448/ 69,3%
Sámi joavkkut	73,3%	63,3%	53,3%	54,1%
Dáža bellodagat	27,7%	36,7%	46,7%	45,9%

Eai buot jienat ovddastuvvon

Válggain leat olut jienat mat eai leat ovddastuvvon Sámedikkis. Dásá lea sivvan dat go eanaš unnit joavkkut eai juvssá nu olu jienaid válgbaiirres ahte ožzot áirasa. Go lohká olles riikka jienaid oktii, de lei 1989s sin lohku 1.033 jienä, 25%, ja 1993s fas 1.499 jienä, 27,8%. Sámi joavkkuid ja dáža bellodagaid logut leat sullii seamma dásis.

Dattege leat válganjuolggadusat nu ahte unnit joavkkut sáhtte muhtin biirres oažzut dan mađe jienaid ahte ožzot maiddái áirasa Sámediggái. Nu lea leamaš Sámedikkis álggu rájes juo nu gohčoduvvon "ovt'olbmo joavkkut". Vaikke vel válganjuolggadusaid leat riev-dadan, ja válgbaiirriid časkán oktii, de lea leamaš manjemuš áigodagas ge "ovt'olbmo joavkkuin" stuorra väikkahanvejolašvuhta. Dán fámu sii ožzot go stuorát joavku dárbaša sin doarjaga dasa ahte ásahit eanetlogu, ja beassat cegget "ráddhehusa".

Johttisámelista ain bistimin

"Ovt'olbmo joavkut" ihtet ja jávket, orru leat leamen oalle dábálaš go geahčá makkár listtat leat oassálastán válgguide. Dušše *Johttisámiid lista* lea unnit joavku mii lea bistevaččat oassálastán. Listta nana ruoktu lea Guovdageaidnu. Vaikke vel časke oktii Sis-Finnmárkku válgbaiirriid stuorra válgbaiirrin mas maiddái Porsáŋgu lea mielde, de dattege lei jienasteaddjiid lohku manjemuš válggas nu stuoris ahte ožzo 2 áirasa. Ii dáidde dát ealáhusa lista nu bures lihkostuvvat 2013 čavča válggas, go dál leat Ávjobári biirres guokte válgalistta maid sáhttá gohčodit ealáhuslistan. Dasto leat eará listtain ge johttisámi ovddasteaddjit njunuš sajiin listtain. Dasto massá

Ávjobári 1 áirasa 2009 válggaa ektui, vállje dál 8 iige 9 áirasa Sámediggái.

2009 válggaa 7 válgbaiire jienat

Dán tabeallas lea manjemuš válggaa bohtosat, buoidu-dan loguid válgbaiirriin gos dáža bellodagat leat ožzon eambbo go beali jienain. Lea "váralaš" oaivvildit juoga das manne aiddo golmma biirres leat dáža bellodagain eambbo jienat go sámi joavkkuin. Oassi fástádusas sáht-tá leat dat go aiddo dáid biirriin leat stuorát gávpogat. Nuortaguovllu biirres lea Čáhcesuolu ja Girkonjárga, Davviguovllus fas Áltá ja Hammerfeasta, ja Gáisi biirres lea Tromssa stuorragávpot. Dásá mis válu dat maid Sámediggi lea guhká ohcalan, namalassii válgaboh-to-siid dutkan. Doaivumis dákkárat ilbmet fargga, de mii diedášeimmet eambbo dan birra manne masá bealli Sámedikki jienasteaddjiin jienastit dáža bellodagaid.

1 Nuortaguovlu	Sámi	44,3%	Dáža	55,7%
2 Ávjobári	Sámi	64,3%	Dáža	35,6%
3 Davveguovlu	Sámi	40,4%	Dáža	59,6%
4 Gáisi	Sámi	45,4%	Dáža	54,6%
5 Viestarmearra	Sámi	60,2%	Dáža	39,8%
6 Máttasámi guovlu	Sámi	62,8%	Dáža	37,2%
7 Máttá-Norga	Sámi	64,2%	Dáža	35,8%

2013 Sámediggeválgá

Seamma olu áirasat galget válljejuvvot boahtte čavča válggas go 2009, muhto juohkáseapmi rievдá. Galget válljejuvvot 39 áirasa. Man galle áirasa juohke válgbaiirres válljejít, mearrida dat man ollu ledje diedžihuvvon Sámedikki jienastuslohkui geassemánu 30. b. dan jagi

goas mañimuš gielddastivra- ja fylkkadiggeválga lea dollojuvvon, mearkkaša 2011.

Áirrasjuohku válgabiirriin 2013 sámediggeválgi (dávgiid siste erohus 2009 ektui):

Válgabiire	Man ollu leat jienastuslogus	Áirasat 2013
Nuortaguovlu	2177	6
Ájovárrí	3532	8 (-1)
Davveguovlu	2006	5 (-1)
Gáisi	2041	6
Viestarmearra	1455	4 (-1)
Åarjel-Saepmie	904	4 (+1)
Lulli-Norgga	2047	6 (+2)
Submi	14162	39

Dán tabealla dieduide lasihan dušše iežan einnosteami, gáttán Bargiidbellodat ja NSR bissuba stuorra joavkun, ja ahte ain leat boahtte áigodagas ge Sámedikkis mánga smávit joavkku mat áiggošedje mearridit galgá go Bargiidbellodaga Vibeke Larsen vai NSRa Aili Keskitalo leat boahtte sámediggepresideanta.

Leat go Sámedikkit duohta sámiid ovddasteaddji ásahusat?

Dasto mii loahpas vel unnánaš jorahat jurdagiid dien hástaleaddji gažaldaga birra. Dattege in sáhte fástditit *leat* dahje *eai leat*. Fuomášahtán goit dan ahte mun in leat dás bajábealde digaštallan in ge čilgen doahpagiid maid lean geavahan. Sáhttá go omd. čohkket ja dahje sirret Sámedikki joavkkuid nu mo lean dahkan, namahit daid sámi joavkun ja dáža politihkalaš bellodahkan?

Mun lean goit atnán dan dábálaččat dohkkehuvvon ah-te Arbeiderpartiet/Bargiidbellodaga ja Olgeš/Høyre sámi miellahtut ja áirasat maiddái leat miellahtun namahuvvon dáža politihkalaš bellodagas, ja nu ovddastit maiddái riikkabellodaga, retoralaččat daddjon: odne ovddastit Sámedikkis Jens Stoltenberg ja Erna Solberg.

Lean áiggiid čađa leamaš eatnat digaštallamiin iežan sámi "ideologalaš vieljaiguin ja oappáiguin" APs ja SVs. Eat ge mii oro áddemin bellodaga ovddasteami seamma láhkái, eat ge goit bija seamma deattu dasa ahte maiddái dáža bellodagaid mearridanstruktuvra lea nu ahte bellodagaid riikkačoahkkimat, ja dan guovddáš orgánat leat mat loahpalaččat mearridit, eai ge báikkálašbellodagat dahje bellodagaid Sámedikki joavkkut. Mun jearan vel dalle retoralaččat ahte leat bat dáža bellodagat mat leat Stuorradikkis dohkkehan Sámediggái iešmearrideami, muhto Stuorradiggi gal ii leat? De ferte dovddastit ah-te bellodagaid sámi ovddasteaddjin galgá leat buorre ja njuolgga oktavuohta dáža bellodagaid mearri-deaddji birrasii, ja nu sáhttet njuolgga váikkuhit omd. iešmearrideami áššis. Buorebut váikkuhit go duot "olggobealde" sámi joavkkut. Muhto de gis ihtá diet váivves gažaldat - dárbašat bat mii dalle oppanassii ge Sámedikki, go mii sáhttit dáža bellodagaid čađa ja bokte ovddidit áššiideamet?

De gal muittuhin vel Murmánskka-ságastallamis Álgo-álbmogiiid Máilbmerádi (WCIP) vuosttas presideanta George Manual čuoččuhusa, ja jerren: Lea go nu ahte eai sii leat koloniseren dušše min eatnamiid, muhto maiddái min jurddašeami?



Nuppi sátnegirjjis nuppi sátnegirjái

– MOVT OVDDIT SÁTNEGIRJJIT LEA VÁIKKUHAN
MANJIT, HÁMIID JA SÁNIID DÁFUS

Go Jens Andreas Friis ráhkadii su stuora sátnegirjji (*Ordbog over Det Lappiske Sprog*) mii addojuvvui olggos 1887, de eai lean go guokte (stuorit) sátnegirjji addojuvvon olggos ovdal, nubbi Norgga bealde (Knud Leem: *Lexicon lapponicum*, 1768) ja nubbi Ruota bealde (Erik Lindahl & Johan Öhrling: *Lexicon lapponicum*, 1780). Sihke Leem ja Lindahl & Öhrling geavahedje earret dáruagiela/ruotagiela latiinna giela lassin sámi sániid čilgehusaide ja Friis čuovui maiddái dan tradišuvnna ja geavahii latiinna giela ja dáruagiela čilgehusaide. Leem sátnerádju leai davvisámegiella ja leai čohkkejuvvon Norgga bealde ja Lindahl & Öhrling sátnerádju leai čohkkejuvvon Ruota bealde, namalassii ubmisámegiela guovllus. Go Konrad Nielsen bargagodii davvisámegiela sátnegirjjiin 1900-logu álgogeahčen, de leai jurdda ahte sátnegirji galggai addojuvvot olggos Hungárias, ja ahte čilgehusat galge čállojuvvot hungária ja duiskka gillii. Muhto go Nielsena sátnegirji (oasit I–III) almmuhuvvui 1932–38, de das ledje čilgehusat dár-

ru- ja eanagalasgillii. Dán artihkkalis mon geahčan govt ovddit sátnegirjjit leat váikkuhan manjat sátnegirjjiid ja erenoamážit govt Nilsena sátnegirji lea váikkuhan manjat davvisámegiela sátnegirjjiid hámí ja sisdoalu.

ČÁLLINVUOHKI¹

Vuosttas sámegiel girji almmuhuvvui 1619 ja leai Nicolaus Andreæ *ABC Book på Lappesko Tungomål*. Dan girjji sámegiella leai mánjga dáfus váilevaš ja čállinvuohki eahpesihkar. Dovddus rohkadusa álgu leai čállojuvvon čuovvovaččat:

Ackia mijen iucht lie almen sis / ailes hiedde tdu
Namme. Quöijk pote tdu Rijke. Hiedde tdu sjite
/ nimpt almis kockt ai ädnamis.

Seamma jahkečuođi gaskkamuttus (1648) almmuhuvvui Johannes Tornæusa *Manuale Lapponicum*, ja das leai seamma álgu čuovvovaččat:

¹ Gáldu: Bergslund, Knut (1951–52) Hvordan den nye samiske rettskrivningen ble til. *Samisk selskaps årsbok 1951–52*: 28–50.



Badjin Jens Andreas Friis. Konrad Nielsen ja Elen Olsen (Buolbmágis eret, govva lea 1899 rájes). Israel Ruong. Vuollin Knut Bergsland Váljogas. Vuolliin olggešbealde Knut Bergsland, Israel Ruong ja Pertti Itkonen.

Ätze mijen jocko lie Almen sis. Passe liekos tuun Nabm. Quoiku-potus tuun Rijk. Schiadlus tuun wilio naukoht Almesn / naui ai Ednamen aln.

Vaikko daid jorgalusaid vuodđun ii lean seamma suopman, de liikka sahttá oaidnit mot Tornæusa jorgalus lea čuovvulan Andreæ jorgalusa. Nubbi ášši lea maiddái ah-te eai geavahuvvon dakkár bustávat mat livčče govvidan sámi jietnadagaid. Dan sadjái leat geavahuvvon bustávat mat ledje ruotagielas ja leat geavahan máŋga bustávat ovta sámi jietnadahkii, omd. schiadlus (šaddos).

Dán sullasaš čállinvuohki geavahuvvui maiddái 1700-logus ja Leem geavahii dakkár vuogi go ráhkadii su sátnegirji 1768 ja nu dagaiga maiddái Lindahl & Öhring sudno sátnegirjjis 1780. Vuostas guhte álggi hutkat iežá vuogi čállit sámi jietnadagaid leai dánskalaš gielladutki Rasmus Rask guhte leai odđasis cielggadeame sámi giellaoahpa Leem giellaoahpa vuodul. Ja dan oktavuođas bodiiga Nils Vibe Stockfleth

ja Hans Mortensen Kolpus (Čáhcesulloš eret) Københavnii ovttasbargat Raskiin vihtta mánu. Dát ovttasbargu šattai vuodđun odđa čállinvuohkái sámegiela ji- etnadagaid hárrái. Rask geavahišgodii omd. dáid konsonánttaid; ð, t, n, ja čálii sibilánttaid ja affrikáhtaid s, c, z ja š, č, ž, vaikko ieš ii duostan vel geavahit š, č, ž, iežás bargguin, muhto čálii daid sadjái sh, ch ja zh. Stockfleahta gal geavahii iežás giellaoahpas (1840) visot daid bustávaid ja Friis čuovvulii Stockfleahta čállinvuogi ja dan rájes leat davvisámi jietnadagaid váras geavahuvvon sierra bustávat, nu got otne nai ain čállojuvvojít.

Čállinvuogis ii vel Friis áiggige boahtán dássemolsašupmi čielgasit ovdan, nu ahte visot erohusat jietnadeami dáfus eai oidnon čállinvuogis, omd. erohus oahppat ja soahpat gaskkas, mat čállojuvvojít oappat ja soappat. Leai Konrad Nielsen gii vuostas geardde hei- vehii čállinvuogi nu ahte dássemolsašupmi bodii ovdan ja maiddái ahte čállinvuohki earuhii dakkár jietnada-



gaid go *lč* ja *lč*, omd. *balča* ja *buolča*, maid Friis čállii *balcā* ja *buolcā*. Konrad Nielsen maiddái geavahišgodjii deattamearkka ('), vai sáhtii earuhit jietnadagaid dakkár sániin go *oap'pat* ja *soappat* ja maiddái *beas'i* ja *beassi*. Dán čállinvuogi geavahii Nielsen su giellaoahpas *Lærebok i lappisk* (1926–29) ja su sátnegirjjis *Lappisk ordbok* (1932–38). Deattamearkka leai gal J. Qvigstad geavahan moaddelot lagi ovdal go earuhii dakkár sániid go *bar'ko ~ barko* ja *av'jo ~ avjo*.

SÁTNERÁDJU

Knud Leem, guhte leai leamaš mišoneara Porsáŋggus, bijai su sátnegirjebarggus stuorimus deattu sániid ja hámiid dáfus dan suopmanii mii hubmojuvvui doppe ja Stockfleahta, guhte leai leamaš mišoneara Čáhcesullos, geavahii dan guovllu suopmana vuodđun su sátnegirjebargui. Friis, nuppi dáfus, anii Guovdageainnu suopmana vuodđun sátnehámiide ja sutnje leai stuora veahkkin Qvigstad, guhte orui Romssas, erenoamážit davvisámegiela lulimus suopmana sániid čohkkemis, muhsto Friis geavahii dattege Leem sátnegirjji vuodđun su sátnegirjebargui.

Konrad Nielsen čohkkii sániid su sátnegirjái ja giid 1906–11, go leai orodan "guhkit áigge" Finn-márrkus ja go su luhtte Oslos ledje leamaš guokte giellačeahpi, vuohčan nubbi Kárášjogas eret, ja dasto nubbi Guovdageainnus eret, ja loahpas vel goappašt oktanaga. Su vuodđomateriála leai goit Friis sátnegirjji ja maiddái sátnecoakkáldat maid Qvigstad leai čohkken ja maid son divttii Nielsena geavahit. Jurdda addit olggos girjji Hungárias ii šaddan duohtan vuosttaš máilmisoađi geažil ja Nielsen oačcui iežá doaimmaid nu ahte sátnegirjebarggus ii šaddan báljo mihkege easka go Nielsen oačcui jearaldaga kulturutkama

instituhtas (Instituttet for sammenlignende kulturforskning) ráhkadit sátnegirjji su vuodđomateriálas loahpageahcen 1920-logu. Instituhta leai dalle addime olggos Nielsen giellaoahpa (*Lærebok i Lappisk, Bind I–III*, 1926–29). Ovddit jurdda sátnegirjjiin leai ahte Buolbmága, Kárášjoga ja Guovdageainnu suopmaniid sánit ja jietnadagat galget leat válđoulbmilin sátnegirjji barggus, muhsto Nielsen rievdadii plánaid ja evttohii ahte sátnegirjái galget maiddái válđojuvvot mielde dajaldagat, vái giellageavaheapmi boahdá ovdan. Dan ođđa sátnegirjjis galget maiddái leat čilgehusat dárogillii ja vel ovtta vieresgillii, mii šattai eangalasiella, iige duiskagiella mii dalle livččii leamaš lunddolaččamus. Sátnegirjji ohcansániid čállinvuohki álkiduvvui ja Buolbmága hámit šadde válđohápmin, vaikko suopmanerohusat bohtet ovdan fonehtalaš čállinvuogis. Sátnegirjái válđojuvvojít mielde dajaldagat, maid Nielsen ieš leai čohkken, ja de vel lassin čohkkejuvvoyit máinnasgirjeráiddus maid Qvigstad leai addán olggos (*Lappiske eventyr og sagn*, 1927–29). Barggu čohkket dajaldagaid doaimmahii Asbjørn Nesheim, guhte manjnil doaimmahii sátnegirjji mapimus guokte oasi (*Lappisk ordbok, Vol. IV–V*). Hans J. Henriksen (sápmelaš Buolbmágis eret) dárkkistii jorgalusaid dárogillii ja A.G. Jayne jorgalii dárogielas eangalasgillii. Nielsena válđoinformánttat ledje Elen Olsen (Buolbmágis eret), Samuel I. Norvang (Kárášjogas eret) ja Johan A. Spein Oskal (Guovdageainnus eret).

Nielsena bargovuohki ii boađe ovdan su sátnegirjji álgosániin iige datge makkár eavttuiguin informánttat barget, muhsto orru goit Friis sátnegirjji sátnerádu leat leamaš vuodđun. Nielsen lea oainnat geavahan dakkár merkenuogi sániide, ahte lea merken jus sátni gulá visses suopmanii oanádusaiguin P (Buolbmát), Kr



(Kárášjohka) ja Kt (Guovdageaidnu). Jus informántii ii lean visses sátni áddehahti, de lea merken (#), omd. Kt #, jus áddii sáni, muhto ii lohkan gullat suopmanii, de lea merken (#), ja jus informánta logai ahte sátni lea ráhkaduvvon suopmana njuolggadusaid mielde, muhto ii leat dattege dohkálaš, de lea merken (†). Dasa lassin lea vel merken jus sátni gullá guovllu badjeolbmuid suopmanii, namalassii Kt n ja Kr n. (Geahča gova 1.) Lea vel merken jus su veahkkebargi (Henriksen) lea lohkan sátni gullá Buolbmága suopmanii, muhto su (váldo)infor-mánta ii leat lohkan dan, de lea merken sáni manjŋái P (indiv.).

julmâgit P *jùlmágéht*, Kr n *jùlmâgjhk*,
Kt †, become julmás | bli julmás.
[julmás]
julmás -l'bm- (ikke attr.) P *julmás*,
ju'lbmás-, Kr ‡, Kt ‡ (n ‡), = jul'-
bme. [jul'bme]
julmok (uf.) P ‡, Kr n *ju'lmoðhk*, attr.
-ðhis, Kt *julmøht*, attr. -ðhis, = jul'-
bme. [jul'bme]

Gova 1. Nielsen merkenvuohki jus sátni gullá vissis suopmanii.

Nielsen lea guorahallan sániid Buolbmágis, Kárášjogas ja Guovdageainnus earret eará Friis sátnegirjji vuodđul ja sátnéráduj gokčá daid guovlluid.

BERGLAND-RUONG ČÁLLINNUOHKI

Loahpageahčen 1940-logu álggahuvvui bargu oažžut oktasaš davvisámegiela čállinvuogi Norgga ja Ruota beallái. Njunnošis dan barggus leai Knut Bergsland (Norgga bealde) ja jurdda leai ahte Konrad Nielse-

na čállinvuohki galggai leat vuodđun. Norgga bealde ledje earret Knut Bergsland čuovvovaš olbmot mielde čállinvuogi barggus: Konrad Nielsen, Asbjørn Nesheim ja Hans J. Henriksen, ja sii sáddejít čállinvuogi evttohusa Ruota beallái geassemánus 1947. Ruota bealde ledje mielde Israel Ruong, Björn Collinder ja Harald Grundström, ja sii sáddejedje ruovttoluotta sin iežaset evttohusa, mas earret eará leai válđojuvvon eret deattamearka, omd. cállit sii *dubbmim* (dan sadjái go *dub'mim*) ja sis ledje maiddái eará evttohusat mot dássemolsašupmi galggai boahtit ovdan čállinvuogis. Romssas dollojuvvui čoahkkkin borgemánu loahpas 1947 masa (Norgga) Girko- ja oahpahusdepartemeanta leai bovden ja dan čoahkkimis oassálaste earret eará Knut Bergsland ja Israel Ruong, ja soai oačuiga bargun čoavdit čállinvuogiášsi jođáneamos vuogi mielde. Bergsland ja Ruong gávnnaideigga Uppsalas čakčamánu álggus seamma lagi ja čáliiga evttohusa ovttas Björn Collinderiin, mas earret eará deattamearka ii galgan geavahuvvot go dalle go leai jur bággu, ja maiddái ahte *gj* sadjái galggai čállojuvvot *dj*. Evttohus ii válđojuvvon vuostá buriin mielain Oslo ja čállinvuohki giedđahallojuvvui vel oktii Norgga joavkkus čakčamánu loahpas ja Ruong bodđii Oslo mánu manjŋel gos dat loahpalaš evttohus dohkkehuvvui ja maid Bergsland ja Ruong čáliiga vuollái skábmamánuus 1947. Dan evttohusa dohkkehedje Norgga ja Ruota skuvlaeiseválddit 1950 ja 1951. Čállinvuohki lea gohčoduvvon Bergsland-Ruong čállinvuohkin ja dan čállinvuogis doalahuvvui Nielsena vuohki guovddáškonsonánttaid hárrái, nu ahte deattamearka geavahuvvui Nielsena čállinvuogi mielde, muhto *d'dj* ja *ddj* čállojuvvui dan sadjái go Nielsena *g'gj* ja *ggj*, omd. *soaddji* vs. *soaggji*.



Skuvlagirjjit čállojuvvot das duohko dan odda čállinvuogi mielde. Sihke Bergsland ja Ruong čáliiga giellaoahpa odda čállinvuogi mielde: Knut Bergsland: *Samisk grammatikk med øvelsestykker* (1961) ja Israel Ruong: *Min sámeigiella* (1970). Jagi 1973 almmuhuvvui vuosttaš sátnegirji odda čállinvuogi mielde: Olavi Korhonen: *Sádnigir'ji sámigielas ruotagillii, ruotagielas sámigillii*. Sátnegirjjis ledje sullii 6 000 sámi ohcansáni. Sátnegirji oačcui stuora mearkkašumi go dan áiggi ledje sámi nuorat lohkagoahktán sámeigiela universitehta dásis, Norggas Oslo universitehtas ja Ruotas vuostazettiin Uppsala universitehtas ja de manjel maiddá Ubmi universitehtas, go dat universitehta oačcui sámeigiela professoráhta 1974. Norgga bealde almmuhuvvui dárogiela-sámeigiela sátnegirji 1975: Thor Frette: *Norsk-samisk ordbok. Dárugiel sámigiel sádnigir'ji*. Frette girjjis ledje sullii 11 000 dárogiela ohcansáni ja sátnegirjjis ledje maiddái odda sámi sánit maid Frette ieš leai hutkan dahje mat ledje geavahusas dalle, muhto mat eai gávdnon eará sátnegirjiin. Frette sátnegirji geavahuvvui viidát ii dušše Norggas, muhto maiddái Ruotas. Ovadal Frette eai lean almmuhuvvon dáru-sámi sátnegirjjit earret Stockfleahta dáru-sámi sátnegirji (*Norsk-lappisk Ordbog* 1852). Ii Frette iige Korhonen leat čilgen gos sánit leat čohkkejuvvon dahje jus mii nu sátnegirjjiid leamaš vuodđun.

OKTASAŠ DAVVISÁMEGIELA ČÁLLIN-VUOHKI

Sámekonfereansa 1973 attii Sámi giellalávdegoddái bargun ráhkadir oktasaš čállinvuogi Norgii, Rutđii ja Supmii. Bergsland-Ruong čállinvuohki geavahuvvui dalle Norggas ja Ruotas, muhto Suoma bealde leai eará čállinvuohki anus maid Paavo Ravila leai ovddi-

dan 1930-logus ja maid Erkki Itkonen veahá rievdadii 1950-logus. Jurdda leai ahte oktasaš čállinvuohki galggai gokčat sihke davvisámeigiela ja julevsámeigiela, muhto giellalávdegoddi ii nagodan soabadit ja 1978 dohkkehii Sámekonfereansa oktasaš čállinvuogi davvisámeigiela várás, maid giellalávdegoddi leai válbmen. Moadde smávva rievdadusa dahlkojuvvodje veahá manjelaš ja čállinvuohki lea 1979 rájes leamaš geavahusas.

Norgga bealde addojuvvui olggos smávit sátnegirji 1983 (Nils Jernsletten: *Álgosátnegirji. Samisk-norsk ordbok*), mas ledje lagabui 5 000 ohcansáni, ja Ruota bealde addojuvvui olggos skuvlasátnelistu 1984 (Mikael Svonne: *Sámeigel-ruotagiel skuvlasátnelistu. Samisk-svensk skolordlista*), mas ledje lagabui 7 000 ohcansáni. Vuosttaš stuorit sátnegirji mii almmuhuvvui odda čállinvuogi mielde leai Pekka Sammallahти *Sámi-suoma sátnegirji* 1989. Dat sátnegirji leai vuosttaš stuorit sátnegirji manjel Nielsena sátnegirjji almmuheami 1932–38 ja sistisdoallá sullii 35 000 ohcansáni. Nielsen leai juohke sátnái merken man suopmanis sátni geavahuvvui, nu got su informánttat ledje diedđihan. Sammallahти sátnegirjjis ii boade ovdan gos sánit geavahuvvot, muhto sus leamaš vissásit Nielsena sátnegirji soameslágán vuodđun ja de lea vel čohkken sániid eane-musat Suoma ja Norgga bealde. Su vehkiid gaskkas leat jur moattis Ruota bealde. Nielsena sátnegirji lea áidna davvisámeigiela sátnegirji mii čajeha man suopmanii vises sátni gullá dahje ii gula. Sammallahти lea gal merken muhtin sániide ahte gullet Norgga beallái (N) Ruota beallái (R) dahje Suoma beallái (S), muhto ii fal makkár suopmanii sátni gullá.

Go lohká Nielsena sátnegirjji, de oaidná ahte eai visot sánit (badjel 25 000 sáni mat leat su sátnegirjjis) gula seamma suopmanii, ja seamma lágje ferte maid



leat Sammallahti sátnegirjjis; sátnerádju ii govčča olles davisámegiela guovllu, mottiin spiehkastagain mat leat merkejuvvon (N), (R) dahje (S), muhto sátnegirji sistisdoallá davisámegiela sániid mat geavahuvvojít Sámis, muhto visot sánit eai geavahuvvo ovtta ja seamma suopmanis, ja danin orru joavdelas diehtu ahte visses sátni geavahuvvo omd. soames Ruota beale suopmanis. Leat moanat sánit sátnegirjjis mat eai geavahuvvo Ruota beale suopmaniin, ja seamma lea maiddái Nielsena sátnegirji sátnerádjosioin. Nuppi dáfus geavahuvvojít dain suopmaniin sánit mat eai leat Sammallahtis eage Nielsenis. Sammallahti almmuhii maiddái sámi-suoma-sámi sátnegirji (1993) mas ledje sullii 12 000 sámi ohcansáni ja vel canet suoma ohcansáni.

Norgga bealde almmuhuvvui *Sámi-dáru sátnegirji* (1995). Vuoddun dan girjái leai Sammallahti sátnegirji 1989 ja sámi-dáru sátnegirjjis leat sullii seamma olu sánit go Sammallahti sátnegirjjis. Vaikko Sammallahti sátnegirji leamaš vuoddun, de orrot goit Nielsena sátnecilgehusat geavahuvvon veahkkin, ja muhtumin leat válđojuvvon sánis sátnái. Nielsena čilgehusat sátnái *rui'bat* ja *roai'bat* leat jur seammalágánat Sámi-dáru sátnegirjjis (buohtas govaid 2–3 ja 4–5). Lea gal veaháš imáš go sátnegirjjis 1995 doalahuvvo sohkabeale čilgehus mii leai sátnegirjjis 1938.

rui'bat P (indiv.) *rui'båht*; Kr *rui'båhk*, Kt *rui'båht* P sit, stand or lie old and wrinkled (especially of women); Kr, Kt = *roai'bat*, but weaker | P sitte, stå el. ligge gammel og rynket (især om kvinder); Kr, Kt = *roai'bat*, men svakere. [rui'be]

Govva 2. Sátni *rui'bat* (*ruibát*) Nielsena sátnegirjjis.

roai'bat P *røpj'båht*, Kr *røaj'båhk*, Kt *røpj'båht* 1. stand or lie all twisted; Kr, Kt also: stand or lie emaciated (of reindeer) | stå el. ligge med sin forvridde fasong; Kr, Kt ogsá: stå el. ligge skinnmager (om ren). 2. stand, sit or lie with a twisted mouth or with one's mouth contorted ready to cry | stå, sitte el. ligge med forvridd munn eller med munnen fortrukket til gråt. FR. *roaibbat* (~ *ruibbat*), *roaibam*. — Cfr. *rui'bat*. [roai'be]

Govva 3. Sátni *roai'bat* (*roaibát*) Nielsena sátnegirjjis.

ruibát v. stå el. ligge med sin forvridde fasong, stå el. ligge skinnmager (om rein); stå el. sitte el. ligge med forvridd munn eller med munnen fortrukket til gråt; sitte el. ligge gammel og rynket (især om kvinder)

Govva 4. Sátni *ruibát* Sámi-dáru sátnegirjjis.

roaibát v. stå el. ligge med sin forvridde fasong, stå el. ligge skinnmager (om rein); stå, sitte el. ligge med forvridd munn eller med munnen fortrukket til gråt

Govva 5. Sátni *roaibát* Sámi-dáru sátnegirjjis.

Ruota beale almmuhii Mikael Svonni sámi-ruota, ruota-sámi sátnegirji (1990) ja das ledje sullii 8 000 sámi ohcansáni. Váldogáldun dan sátnegirjái leai Nielsena sátnegirji, muhto Sammallahti sátnegirji 1989 geavahuvvui maid veahkkin. Dán jagi addojuvvui sus olg-



gos odđa sátnegirji, mas leat sullii 15 000 sámi ohcan-sáni (Mikael Svonni: *Davvisámegiela-ruotagiela, ruotagiela-davvisámegiela sátnegirji*). Dan sátnegirjái leat maiddái válodojuvvon mielde sánit Ruotabeale suop-maniin, namalassii Čohkkirasa suopmanis, mat leat sátnécoakkáltagain Uppsalas, nubbi lea Björn Collinderä čoakkáldat (1928–32) ja nubbi lea K.B. Wiklunda čoakkáldat (1914). Vuodđun dáidda čoakkáltagaide lea leamaš K.B. Wiklunda julevsámi sátnegirji, mas leat sullii 5 000 sáni.

Dáru-sámi sátnegirji (Stor norsk-samisk ord-bok), man vuodđun leai sámi-dáru sátnegirji (1995), addojuvvui olggos 2000. Pekka Sammallahti ja Klaus Petter Nickel leaba ráhkadan sámi-duiska sátnegirjiji (2006) ja maiddái duiska-sámi sátnegirjiji (2008).

ALFABEHTA ORTNET JA DÁSSE-MOLSAŠUPMI

Konrad Nielsena alfabehta ortnegis bodđii *z* ja *ž* bustávaid *c* ja *č* manjái, nu ahte alfabehta álgú leai *a/á b c č z ž d đ* Nielsenis ii lean ortnega dáfus erohus *a* ja *á* gaskkas. Dakkár alfabehta ortnet leai maid Olavi Korhonena sátnegirjjis 1973. Go odđa čállinvuohki bodđii geavahussii, de rievddai maid alfabehta ortnet, nu ahte *z* ja *ž* bohtet alfabehta loahpas ja ahte *a* ja *á* earuhuvvui, ja alfabehta šattai dakkárin: *a á b c č đ ž s t t u v z ž*, ja dakkár ortnet leai Sammallahti sátnegirjjis 1989.

Konrad Nielsen leai vuostras guhte ollásit sáhtii čájehit davvisámegiela dássemolsašumi čállinvuogi bokte. Okta deatalaš vuohki leai geavahit deattamearkka, nu ahte sáhtii earuhit dakkár sániid go *beas'si* (nom) ja *beassi* (gen), muhto deattamearka geavahuvvui su čállinvuogi mielde maid eará dássemolsašumi dáhpáhu-

sайде. Sátnegirjjis boahtá álo ovdan dássemolsašupmi. Jus lea guovttestávval substantiiva, de sáni manjái čállojuvvo geahnohis dási guovddáškonsonántta dahje konsonánttat, omd. *čor'bma -rbm-*, ja jus lea njealjéstávval substantiiva, de čállojuvvojot sihke gievrras ja geahnohis dási konsonánttat sáni manjái, omd. *čuolátak -kk- -g-*. Jus sánis ii leat dássemolsašupmi de sáni manjái lea čállojuvvon (uf.), omd. *čál'le* (uf.) Bára-his stávval sániide čállojuvvo sáni manjái dat oassi mii sojahettiin rievđá, omd., *naitos -i'tus-, rikkos -k'kus-*. Seamma vuohki geavahuvvo maiddái go lea kontrákta sátni, omd. *olmai -l'bma-, sárves -r'vá-*.

Olavi Korhonen (1973) geavahii seamma vuogi bárrastávval sániide, ja jus sánis ii lean dássemolsašupmi, dalle ii čállán maidege sáni manjái. Bárahis ja kontrákta sániide son čállii olles sojahanmáddaga, omd. *náitox nái'tus-, rikkos rik'kus- ja ålmai ålbumá-, sarvis sar'vá-*.

Sammallahti (1989) ráhkadii iežas vuogádaga got dássemolsašupmi galggai boahtit ovdan. Bárrastávval sániide ii merken maidege jus dássemolsašupmi čuovui dábálaš njuolggadusaid. Bárahis stávval ja kontrákta sániide merkii daid osiid mat sojahettiin rivdet, muhto ii maidege eará. Svonni (1990, 2013) lea čuvvon seamma vuogádaga go Korhonena sátnegirjjis leai. Go buohtastahttá Nielsena, Sammallahti ja Svonni vuogádagaid, de bohtet erohusat ovdan tabeallas 1.

NIELSEN 1932–38	SAMMALLAHTI 1989	SVONNI 2013
čor'bma -rbm-	čorbma	čorbma rpm
čuolátak -kk- -g-	čuolahat	čuolahat hk g
čál'le (uf.)	čál'li, =	čálli [-l'l-]
naitos -i'tus-	náittus -ito-	náittus náitos-
rikkos -k'kus-	ribkus, -hkko-	ribkus rihkkos-
olmai -l'bma-	olmmái, -lbum-:Ø	olmmái olbmá-
sárves -r'vá-	sarvvis, -rvá-;Ø	sarvvis sarvá-


Tabealla 1 Dássemolsašumi ovdanbuktin.

Tabeallas boahtá ovdan ahte Sammallahti sátnegirjjis geavahuvvo deattamearka dalle go čállinvuohki ii eaurut gievrramus dásí dakkár sánis go čálli. Svonni, nuppi dáfus, čuovvu čállinvuogi, muhto lea roahkkeruođuid sisá merken ahte sánis lea gievrramus dássi. Sammallahtis lea čálli sáni manjnjái merken ahte sánis ii leat dássemolsašupmi (=) mearkkain. Svonni lea čuvvon Korhonena vuogi.

LOAHPPA

Sáhttá dadjat ahte Norggabeale ja Suomabeale suopmaniid árbevirolaš sátnerádjua lea bures gokčojuvvon sátnegirjjiin mat lea boahtán olggos, muhto Ruotabeale suopmaniid sánit eai leat seamma vuđolačcat čohkkejuvvon. Sáhttá maid lohkat ahte Knud Leem sátnegirji lea leamaš álgun stuorit davvisámegiela sátnegirjebargguide mat dan rájes leat addojuvvon olggos. Leem sátnegirjji leai vuodđun Friis sátnegirjái, ja dat leai vuorusatis vuodđun Nielsena sátnegirjái. Nielsena sátnegirji ja giellaoahppa leat leamaš erenoamáš stuora veahkkin gielladutkiide ja earáide, ja sátnegirji oaččui vel stuorit mearkkašumi dutkiide, studeanttaide ja eará giellabarguide go deaddiluvvui vel nuppádis 1979. Nielsena sátnegirjji hámit ja sánit leat leamaš gáldun ođđaset sátnegirjjiide otná beaivvi rádjái.





Ovdal ja dál

Mis Sámis leat jo oalle olu sátnegirjjit. Daid dárbu orru dušše lassáneamen dađistaga go eanebut hálidit sámegiela oahppat. Sáme-giela máhttu lea nuppástuvvamin servodatrievdamiiid mielde. Olu ovddes doahpagat ja dadjanvuogit hárve šat gullojtit. Giellageavaheapmi lea šaddamin eanet ovttadimenšunála, dan mearkkašumis ahte sámegie-la dajaldatriggodat geavahuvvo uhcit. Giella diedus álo rievđá, dat sámegiella mii otne hállojuvvo vissásit lea oalle earálágan go dat man gulai dušše moatti buolvva áigi. Gielladutkan lea ovdánan, muhto dan vuolggasad-ji sámegiela hárrai lei guhká amasgiellan. Dát maiddá guoská daid veahkkeneavvuide mat leat ásahuvvon giellaoahppama várás. Sámegiella eatnigiellan lea unnit vuoruhuvvon go sámegiella amasgiellan. Universiteh-taид sámegieloahpahus lei álggu rájes vierrásiid várás, erenoamážit báhpaid várás geat dárbbasedje oahppat sámegiela vai buorebut gulahallet searvegottiin.

Leat dievva ášshit sámegielas mat galggašedje dutkoju-vot eatnigel kompetánsa vuodul, muhto ruhtadead-dji eiseváldit ja dutkanásahusat leat vuoruhan earáláh-kai. Sámegiela dajaldatriggodat duođastuvvo dárkilis

doahpagiid bokte eanadagaid, luonduu ja ealliid birra. Govvagiellan sáme-giella lea hui poehtalaš ja metaforalaš, ja livčii duodaid dutkanveara eatnigel-perspektiivvas mo sáme-giella lea doaibman mohkkás beasadan- ja garvvašangiellan eahpenjuolggia kommunikašuvnnas. Livčii olu eanet sahttit ávkkástallat buot dáiid beliin sihke čáppagirjjálašvuodas ja fágateavsttain, muhto olggobealde báidnin lea dagahan ahte mii leat hábme-goahtán min iežamet čállima majoritehta dadjanvugiid ja gulahallama mielde.

Sátnegirjjiid dáfus dilli sulastahttá gielladutkama muđui. Dat leat vuosttažettiin ráhkaduvvon daid várás geat eai máhte sáme-giela. Seammá dilli lea min čállinvugiigun ge. Sámi ortografijaid ulbmilin leamaš dah-kat jienádeami ja čállima nu lahkalaga go oppanassii ge vejolaš. Danin leat ge sámi čállinvuogit dárkilebbo go eanáš eará gielaid ortografijat. Eatnigel čálli ja lohkki livčii birgen olu oktageardánebbo čállinvugiigun go mat sáme-gielain leat. Jákhan dat livčii váikkuhan dasa ge ahte mis livčé lean olu eanet sápmelaččat gear livčé roahkkadebbo geavahan iežaset giela čálalaččat ge. Čállinvuogi ráhkadeapmi ja sátnegirjjiid dahkan leamaš



Ja manin lea dárbu sirdit sámi sátnegirjjiid nehttii

guokte vuogi mo váikkuhit gielladillái. Hui olu áššiid hárrái dat leat váikkuhan buori guvlui, muhto sáme-gielat sápmelaš goittot ge sáhttá navdit ahte su giella-dárbbut eai álo dáidde leamaš ovddimusas go grammatiikat leat čállon ja sátnegirjjit dahkkon. Lingvisttaide leamaš álo stuorra ánsu ja gudni ráhkadit čállinvugiid, erenoamážit unnitlogugielaid. Dávjá vuolggahuvvui ge čállinvuogi bargu Biibbaljorgalemiin, mii lea lassi-duoðaštus dasa ahte mišsuneren lei goit seamma dehálaš go fuolla ordnet álmogii čállingiela.

Sátnegirjjit galggašedje leat álmoga oktasaš opmodat. Giela ii oamas ii oktage dutki – dan dahket giela geava-headdjít. Giella leamaš áiggiid čáda dehálaš identitehta-markerejeaddji ja buoremus assimilerejeaddji. Assimila-šuvnna-doahpaga hárrái mii leat oahppan smiehttat minoritehta ja majoritehta gaskavuoðaid, dábálaččat dan láhkai ahte eanetlohku njamasta unnitlogu iežas gillii ja kultuvrii. Ii álo dattege leamaš nu. Sámi kultuvra maid lea assimileren earáid. Jurddašeħket dušše buot daid láddelaččaid geat leat sámáiduvvan maŋŋil go joh-te Ruijai. Jus sámekultuvra ii leamaš nana kultuvra, de dat ii livčče ceavzán nu guhká unnitlogudilis. Sáme-

kultuvra lei ge ekologalaččat buoremusat heivehuvvon birget goavis ja garra dilálašvuodain davvin. Sámegiel-la speadjalastii dan heiveheami giellariggodagain man ain gávdnat sihke muohttaga, ealliid ja luonduváldda-hallamiid hárrái. Muhto go sámi ealáhusat dál leat riev-damin stuorát leavttuin go goassige ovdal, de dieht-telasat min giella ge bákkus ferte nuppástuvvat amas bázahallat. Dan dihtii ii leat šat seammá dárbu moatti čuohte muohtadoahpagii go min birgenlähki ii leat šat muohttagis ceavzima duohken, eat ge šat dárbbaš seam-má dárkilis luondu namahallamiid go ovdal dan dihtii go GPS čilge hui dárkilit sihke luondu ja mo galgá dádjadit dohko gosa lea mannamin.

Sátnegirjjit speadjalastet sániid lonohallama ge – mo mii leat eará gielain luoikkahan sániid, muhto maiddá mo eará gielat leat muhtun sániid mis válđán iežaset gillii. Dál dáhpáhuvvá eanet go goassige ovdal ahte mii luoikkahat sániid ja olles dajaldagaid ja dadjanvugiid eará gielain. Min idiomat, cieggan dadjanvuogit, leat jávkagoahtán. Dan sadjái jorgaluvvojit erenoamážit dárogiel dajaldagat sámegillii, dego beakkán "beaivelotit čoavjjis", mas sámegielas ii leamaš ovdal dien sullasaš

dajaldat dasa ahte leat veahá jieráskan. Ja gii ain ádde maid mearkkašit omd. dát dajaldagat:

"Don it leat deike gežiid!"

"Ále hálá!"

Goddit čalmmi

Goddalit moji

Guovtti vuosttas dajaldahkii leat mánga eará sullasaš idioma, dego *"Leat go rivttesmielat?"*, *"Maid ban dál leat?"* *"Daja han eará!"* *"Ále jo šat!"* jna. Jearaldat lea maiddá mo jorgalit dajaldagaid omd. dárogillii, erenoamážit dan manjít guoktá mas vuosttas dajaldat mearkkaša ahte čalbmi hilašta, ja nubbi gis ahte livčii miella moddját, muhto ii heive dahje ii dáhko dan dahkat. De nugo ovdamearkkat duoðaštit, mii dárbbašivčiimet maiddá dajaldat- dahje idioma-girjjiid ja eanet synonyma-girjjiid ge. Čilgehusat galggašedje leat sámegillii, muhto dieðus ge min gielladili geažil dárbbašuvvojut maiddá jorgalusat ja buohtastahttimat eará gie-laid dajaldagaide. Muittán ieš go jorgalin sátnevájas-girjji dárogillii, man somá lei ohcat vástideaddji dajaldagaid eará gielain. Bargu šattai beanta kulturdutkamin.

Muhto mo de go máhccat mu čuočuhussii ahte giela sániid eai oamas sátnegirjedahkkit, eai ge gielladutkit, muhto giela geavaheaddjít. Gárttašii go dasto jearaldahkan ahte eai go galggašii oažžut máksojuvvot sin barggu ovddas? Diedus ge galget oažžut bálkká barggu ovddas. Diedán bures ahte lea hui áddjás ja gáibideaddji bargu ráhkadir sátnegirjji, seammás go dat addá vejolašvuodá introduseret odđa sániid ja doahpagiid, ja maiddá liibba evttohit fas váldit atrui buriid ovddeš sániid mat dán áigái hárve gullojut. Erenoamážit guoská dát doaibma daid geavaheaddjiide geat leat oahpahallamin sámegie-la. Dávjá sii leat nuorra olbmot, ja nuorain lea dat ok-

ta eaktu dán áigái ahte diedut mat eai gávdno neahdas, daid ii leat veara diehtit. Seammá guoská maiddá sátnegirjjiide.

Lean gullan olu sámi nuoraid váidaleamen go lea nu fuones ortnet sámi sátnegirjjiid hárrái neahdas, sii bean-ta nuonddahallet ja addet vuollái ohcamis sániid. Ot-ná dilli duoðaid ii leat dohkálaš, de juoga ferte dah-kot. Sátnebánkkut fertejít leat rahpas buot geavahead-djide, ja daid galgá leat álki gávdnat ja álki geavahit. Danin lea mu evttohus ahte Sámedikkit ovttas servet oastit almmuhanvuoigatvuodá buot sátnegirjjiide mat gávd-nojut. Dasa dárbbašuvvo ruhta ovtragearddi máksimii visot vuogatvuodaid ovddas. Danin ii berre hánástad-dat ruhtasumiin, muhto nuppe beales eai dattege leat nu mánga sátnegirjedahkki Sámis, de ii gárttašii nu divrrasin. Sátnegirjedahkkit leat jo ožzon mávssu oktii dalle go girjjit deaddiluvve, de dat maid Sámedikkit fer-tejít dáhkkit dakhkiide lea buhtadusa dan táhpa ov-das maid sii gillájít go vissásit vuvdojuvvoyit uhcit girj-jit dalle go geavaheaddjít gávdnet visot sániid neahdas. Lágádusaide dieðus maid lea táhpa das go uhcit girjjit vuvdojuvvoyit, de das ferte Sámi parlamentáralaš ráðdi (dahje Norgga Sámediggi geas leat ruðat) bovdet sihke čálliid ja lágádusaid ovddasteaddjiid čoahkkimii ságastallat mo buoremusat čoavdit ášši. Ja johtilit, vai sámegiel oahpahallit ja geavaheaddjít ge sáhttet geavahišgoahtit neahtha ressursan giellabargguineaset.

Ja go Sámediggi bovde olbmo ráhkadir idioma-(sátne) girjji – maid áinnas berre dahkat – de galget álggu rájes jo sihkkarastit sihke prenten- ja neahthaalmmuhan-vuoigatvuodaid dasa.



De beste faktabøkene! Buoremus fáktagirjjit!




PAUL PEDERSEN –
ASLE HØGMO
SÁPMI slår tilbake

Innkjøpt av
Norsk kulturråd
ISBN: 978-82-8263-108-2
SIDER: 324
NOK 290,-




KETIL ZACHARIASSEN
**Samiske nasjonale
strategar**

Innkjøpt av
Norsk kulturråd
ISBN: 978-82-8263-117-4
Sider: 368
NOK 300,-



ODD MATHIS HÆTTA
**Samisk reindrift på
Grønland**

Med bidrag og bilder av
Isak Thomas Triumf.
ISBN: 978-82-8263-059-7
Sider: 144
NOK 200,-



MIKAEL SVONNI
Davvisámegiela – ruołagiela.
Ruołagiela- davvisámegiela.


SÁTNEGIRJI – ORDBOK

Nordsamisk – svensk.
Svensk – nordsamisk.
ISBN: 978-82-8263-122-8
Sider: 405
NOK 440,- • SEK 490,-

www.lagadus.org

Mimi Bahl De Leon

Amerikhásápmelaččas Ellen Marie Jensenis ilmmai girji engelasgillii cuonománus 2012 namain **We Stopped Forgetting** (Mii heittii-met vajáldahttimis). Goasttideaddji lea Čálliid-Lágádus. Girji lea 3. ja 4. buolvva amerihká-sápmelaččaid identitehta birra. Dás almmuhat ovta dáid sápmelaččaid mualtusa, nu mo dat lea girjjis. Nils Ole Gaup ja **Sámis** doaimma-headdji John T. Solbakk leaba heivehan Ellen Marie Jensaen girjji Mimi mualtusa sámegillii.



In lean goassige gullan dán nuorra nissonis, Mímis, ovdal go de vázzen su njeaiga muhtin čáppa beaivvi ja munno gávnadéapmi gárttai viehka soaittahat dáhpáhussan. Nisu lea 30 jagi boaris, náitalan ja ássá muhtin báigekottis Seattle-gávpoga davábealde Puget Sound (Pugetnuori) riddogáttis Washington oassestáhtas, ja su ealáhusa bargun lea ruvventerapistta (massage therapist) doaibma. Lea goalmmátbuolvva sápmelaš áhcíbeali sogas.

Fárrolagaid mátkeverddiidanguin ledjen johtán Washington stáhtii ja doppe leimmet orrumen muhtin verdden fulkkiid dálus ja dát olbmot deive lean ássamin indiána reserváhtas. Ledjen gulastan ahte muhtin diimmu mákki duohken ásai miellagiddevaš olmmoš namas Bill Willcox, ja son galggai leat Manitoba ekspedišuvnna sámi boazovázziid manjisboahtti. Su eadni lei riegádan Norgga Guovdageainnus, ja munne

lei muhtin eará amerihká sápmelaš gii lei sutnje oahpis, mualtan ahte dát almmái lea "muosálaš olmmoš guhte máhttá mualtit stuorra dáhpáhusaid tiidda." Ja de mearridin sus jearrat oaččongo su gažadit vai fidnešin cambbo dieduid mu lassánan beroštupmái Alaska sámiid vásáhusain ja dađe mielde beasašin ráhkadit čoakkálđaga dán erenoamáš sámi historjá birra, mii mualta sápmelaččaid immigrášuvnnas Davvi-Amerihkkái. Lei dán albámá bokte ahte mun oahpásmuvven Mími. Mimi ja vánhemat ledje Billas gulastan ahte "sámi dutki Romssas" lei boahatán gávpogii. Moatti diimmu ja olu tiiddaid mappjá, Bill lotkadir láhttestii – "ama mis nu, muhtin sámit leat dál dáppe geat mielas dáhtošedje du deaivat."

Mimi ja su vánhemat dovddahedje hálu gullat mu dutkama birra ja oppalaččatge eanet mu iežan birra go lean sámi amerihkálaš. Dan seammás dohppe-



Mimi Bahl De Leon

hallen dasa movt Mimi ja su áhcči leigga olbmuid vuohkái geaid ledjen ovdal dán jage oaidnán ja deai van Guovdageainnus. Ii lean oppanassiige imaš go gul len ahte soai leigga addo daid olbmuid manjisboahttit ja sullasaččat geaid vuohkái ledjen jurddašan sudno leat. Fuomášin gal maiddái man sakka earálágan Mimi lei su vánhemii, vaikko Mimi ja su áhcči leigga olggosoaidnit dego olbmot geaid dihten leat sudno sogalaččat Sámis. Amerihkálaš oktavuodas gehčon, Mimi lei ruškesivnnat (suhkkes čáhppesruškes vuovttat) ja su vánhenguovttos leigga "vielgagat". Hui geldon kultuvrralaš dovdduiguin ja láđisvuodain, ja easkka dan geažil mii das maŋjá bodii ovdan Mimi ieš-čilgejumis min jearahallamiid ja su čállagiid vuodul, duostan dadjat ná. Dieđekahttá das maid dát erenoamáš dyna mihkka dárrkuhi Mimii, mun vigikeahttá sárdnon das movt mun ieš jurdilin ahte soai guktot leigga olggos-

oaidnit dego livččiiga njuolgga boahtán Guovdageainnus, muhto eaba sulastahttán moktege goappat guoimmiska. Ii munne gártan heammástussan oaidnit viehka valjis variašuvnnaid sámesogat bearrašis. Dávjá muittašan áhcčán ja soapmásiid min fulkkiin ahte sii ledje "dulán ruškadat", ovddimustá amerihkálaš, dahje eanet skandinávia amerihkálaš oktavuodas. Maŋjá bes sen oahppat ahte leat "ruškadin" vilges bearrašis sáhtii mielddisbuktit bávččagahti, muhto dattetge ávkkálaš vásáhusaid Mimii.

Muhto ivdni ii lean fáddán munno álgoságain, iige lean dakkár mii Mimi historjjás geasuhii mu sáhk kesvuoda. Dalán, maŋjá go leimme gávnadan, munno ságat golge álkit go moai de juogadišgodíime bearáshistorjjáid cukcasiid. Moai leimme sullii ovttahkásacčat ja munnos ledje ollu oktasaš tiidabealit mat guske munno dahkamušaide go letne figgan čoavdit

čuolmma mii munno bearrašiin leamaš kultuvrralaš dahje etnihkalaš imasin. Mii vuosttažettiin lei mu mielamilde, lei man uhcán earálagan su historjá lei mu iežan historjjá ektui. Son lea leamaš bearrašisttri njuunušin ohcamin ja dulkomin máttuidis. Lei su oktavuođa bokte Billii, almmái gean ledjen boahtán gažadit, ahte Mimi ja vánhemat ledje ožzon sosiála ja bearashaš oktavuođaid nuppiid Alaska sámiid maŋisboahtiide dáin guovlluin, ja son lei maid fidnen oktavuođa muhtimiidda iežas sogalaččain Sámis. Ieš goit ledjen guhkkin eret báik-kis, go iežan ássanruoktu lei Seattle davábealde ja go namahasten ahte dárbbasañ idjadansaji dáppe gos nu, Mimi dalán bovdestii mu buorredáhtolačcat iežas dállui ja mieđihii munnje su jearahallat virggálačcat iditbeaivvi.

Gažadanboddu vulggi johtui su čilgehusain iežas mánnávuoda vásáhusaiguin dakko mii gustui ivdnai ja etnihkalaš identitehtii, ja de mun rugáhin jearaldagain lei go son mánnávuodastis gullan namahusa "Lapp". Muitalii eatnis leamen 100% kroáhta ja su vánhemat leat "duođaid earálaganat", sihke olggosoidnimis ja iešvuođas; eatni temperameanta lea hui sullii seamma go áhči, ja dadjá vielljas "hámi ja láhttema" kroáhtalažjan." Dajai "diedán in leat álggage vanhemiiddán vuohkái."

Hui mánnán, dalle jo go lei 4-jahkasažjan, muitá son oaidnán goavid amerihkalaš eamiálbmogiid mánain ja duollet-dálle sii lávejedje galat lagaš indiána reserváhta ja dajai "oaidnit ruškes mánáid attii munnje dovddu ahte muhtin láhkai ledjen seahkanin daid sisá." Buddostatnamat dakkárat go "leat indiána, leat neger" fađustuvvo sutnje jo skuvlla vuosttasluohkás. Lávii heahpanaddat ja viehkalit ruoktot jearrat vánhe-miinnis "gii son lei" ja vástádusat lávejedje "leat mánáš, leat kroáhta (čujuhettiin eatni čielga etnihkalaš máttuide) ja Heinz 57:ai." (Heinz 57 lea diehto biđistuvvon

biergu meastu (jukca, buonjus) mas leat 57 njad-dosa. Dábálaččat adno oktasaččat metaforan seahkalas sohkavuoda birra, oaivvilduvvo gii nu, geas leat nu olu máttut).

Mimi joatká,

Lávejin fas máhccat skuvlii ja muitalit mánáide makkár olmmoš lean, ja de heaibben dánna ášiin ja muitalan girjji birra mas lei čálon ovtta mu máttaradjá birra, gii lei duiskalaš ja mun de álo vilpugohten masa nu mii lei eará go manin mu vigge gohčodit. "Lean jo dadjan, lean vilgesolmmoš!"

Bávččagahti vásáhusat mat birastahtte su ivnni ja čearddalaš šaddanvuolgaga eai gávdnon dušše skuvla rájáid siskkobealde. Mimi muitá ahte su eatnibeali bearash lei "viehka rasistalaš". Su váimmusbearash lávii gallestellat eatnibeali fulkkiid Californias gos sánit "spic" ja "nigger" (cielahannamahusat) dávjá ledje anus. Son dávjá bázii jurddašallat dádet dát bilkosat maiddái sutnje oaivvilduvyon. Muhtimin sii fitne boradeamen meksikána restauránttain, ja go burez ledje beavdeguras čohkohallamin, de eatnibeali bearash sahtii báibmagoahtit "rásistalaččat" bálvváid birra. Bálvvát muhtimin álge Mimi buohta láhttet hui eará láhkai (dego son livčče Mexicos vižzon biebmománná) ja čajehišgohte erenoamáš beroštumi sutnje, "Señorita" sahtte sutnje dadjat. Ganjalčalmmiid láhttestii munnje: "Ledjen unnamánáš ja fertejin duostut dáid moivevuođaid." Čuvges liikki geažil man geažil sahittá navdot "vielgagin," áhčis sajáiduvai vuohkkasit eatni bearasholbmuid sisá. Mimi buohtastahtii eatnis bearasholbmuid psykologijja dan ektui ahte livččii bearash mii vašuha homoid

muhto de bearrašis lea okta homo gean sii goit vedjet ja fertejít gierdat. Muhto eai dattetge sáhte dohkkehít homoid joavkun.

Mimi lohká sus lei uhcán oktavuohta áhčibeale bearraša fulkkiide ja nu maid su áhči áhkui. Dađemielde go munno ságat ovdánedje, son dovddahii mo gaskavuohta áhčibeale áhkuin lea. "Mii leimmet buohkat hui guđege guvlui čuldon; mii (su váimmusbearaš) leimmet iežamet bulljarakkis." Bearašdynamihkka su áhčibeale sogalaččaid bearrašin lea dakkár ahte doppe leat olu "suollemasat" dološ bávččagahtti dáhpáhusat, maid birra hárve jos goassige háleštuvvo. Son ádde ahte áhčibeale áhku mánnávuhta leamaš "duodaid vávválaš" go gárrtai oarbbisin, su eadni jámii nuorran ja sii mánát báhce dasa ceavzit okto dan botta go áhčci lei guolásteamnen meara alde. Muhto leamaš gal vissa muhtin sámít Alaskas geat "válde mánáid sisa" ja bibme daid dan botta go áhčci lei mearrabivddus. Mimi lea manjt áiggi boahkt diehtit ahte su áhku eadni, gii lei áigá jápmán, leamaš Siberia Yupik ja áhku áhčci lei duiskalaš. Áhči áhčci lei sápmelaš gii lei olu boarrasat go áhči eadni go soai oahpásmuvaiga ja náitaleigga. Lei áhči mánnávuoda áiggi go sin váimmusbearaš fárrii Alaskas ja ásaiduvai Washington stáhtii. Mimi muittasha ahte sus lei unnán gaskavuohta áhčibeale áhkuin, ja áhči áhčci gii lei sápmelaš jámii ovdal go son lei riegádan.

High school oahppin Mimi dovdagodii iežas leamen "*native*" (eamiolmmožin). "Mu bárdneskibir lávii munneje cavgilit "nu fal, leat *native*" ja mun fas ná "várра nu, lean *native*, muhto duođas in". Dajai ahte son "dovdagodii ja láhtegodii diehto vugiid mielde, dasgo ná lávejítge alladási *native'at* dahkaluddat. Son hálai das ahte lei dego olggoš, ja čuozaí sutnje aiddo seamma bahán go sus ii livčče identitehta dasgo lei dušše dahka-

luddamin. Muitala son muhtin muddui livčii "dohkkehuvvon" muhto dalán go lei almmuhan, son dajai ah-te ii livčče sáhttit, muhto muhtin olbmot dohkkehede su hámi geažil. Irggiinis oasálasttii olu *native* (eamiálbmot) amerihkálaččaid deaivvademiin ja seremoniijain ja soai maiddá finaiga Indian Shaker Church ipmilbálvalusas, mii Mimi mielas lei muhtinlágan "Oarjerritu dáhpi." Logai ahte son muhtináigge rájes gululdaga oaidnigodii iežas ii-leamen siskkobeallai gulli, ja bearrašis árvvoštalle su sohkanama vuodul. Lei sullii dan áiigi goas son "moarástuvvogodii" ja álggi váivašuvvat "dahkaluddamis indiánan."

Lei allaskuvlla vásáhusaid bokte go son fuobmái sámi máttuidis ja ávidii ahte "Lapp" mearkkašii sápmelaš. Lei oassálastán antropologijakursii ja doppe bagadalli jearahišgodii sus (manjá go lei logaldaladettiin namahan ahte son lea *amerihkálaš eamiolmmoš – Native American*) "gii leat don" ja "mii lea du sohkanamma?" Lei aiddo dan kurssa áigge go Ørnuly Vorrena girji (1994) "*Saami, Reindeer and Gold in Alaska*" almmustuvai. Mimi muitalii professorii man váilevaš su máhttu lei Alaska máttuidis birra. Professor rávvii su háhkat dán girji mii gieskat lei ilbman eangalsgillii. Son dajai "Osten gal girji muhto eai lean menddo alla vuordámušat ahte das livčče mihkigie viežzamušaid munne. De healkkehin go áicen iežan bearrašiid namaid girji loahpageahčen, ja doppe maiddái gávdnen áhcán nama!" Dát boddu duodaid čuozaí sutnje, son čierrugodii ja čurvii áhčcái "diedát go ahte mii leat sápmelaččat?"

Namahii ahte vaikko imašvuhta ilbmaniige girji bokte, sus leat eahpečielga dovddut dasa movt dutkamat girji duohken ledje fievrividuvvon ja movt girji lei čállon. Jurddašalai, "Mo dát almmái duostá mu bearraša,

mu áhči birra čállit, áhči han lea ain bárisin eallimin! Ii leat jearran lobi!" Doaivu ahte girječálli joba livčii sáddestan poastakoartta dahje kopijja girjjis ja muitalan ahte lea čádahan dutkama sin birra. Dattetge son dás oačui coavccí ovddosguvlui geahčat ja manai dego jorgalusa čáda, lei gelddolaš ja girjji sánit nannejedje su olmmožin. Jurddašišgodii "mii leat erenoamážat, eat dušše *Heinz 57*, mii leat eamiálbmot, etnihkalaš veahádat." Ja de muitališgodii iežas vánhemiidda eambo su fuomášumiin. Dattetge muhtimat áhčibeali fulkkiin eai beroštan sakka dán áššiin.

Nugo earát ge dán proseassa oassevaldiin, Mimi maiddái vuoinjalaččat jodii "iežas giksašuhti áigo-daga" čáda gos huhccaluvvui ohcagoahtit oktavuođaid sámi olbmuide. Nu maiddái eará Alaska boazosámiid maŋisboahttiide ja olbmuide Sámis. Maŋjálas dáhpáhusat ledje veahkkin, nugo okta soaittáhis háleštallan muhtin siidaguimmiin mii doalvvui su oaidnit allaoahppan sápmelačča guhte deaivvai leat gallestadamin Western Washington State universitehta Bellingham'as. Son dalán doapmalii dán albmá lusa ja su heammástuhtii áicat ahte sus ledje fuolkkit Guovdageainnus ja vel ahte su ádjá áddjá leamaš professora bearraša lagáš ustibin. Go suinna beasai háleštit ja gullat ádjá ja su sogalaččaid birra, de gahčai su ala "dego livčii stuorra vuorbbi vuoitán". Albmá bokte, Bill, gean ovddimustá ledjen boahtán deaivat, bessen maid gullat cukcasiid su sámi ádjás go bodđii Poulsbo báikegoddái galley nuppiid Alaska sámiid; dát fearánat ledje áibbas apmasat Mimi áhčái. Son virkkosmuvai sakka dasgo fáhkka beasai diehtit ahte sus leat valjis fuolkkit áhčis bealde geaiguin ii leat olus álggage leamaš oktavuohta ovdal.

Munno ságain Mimi fas máhcái áigodahkii sullii jahkái 1998 goas "asit laigagohte ja maid álo ledjen at-

nán heahpadin (mii vulggii etnihkalaš máttuin), nup-pástuhhttigohte áhči, ja son čatnagodii mánnávuoda vásáhusaid iežas sápmelašvuhtii." Oktan vánhemiiddisguin Mimi galledii ávvudanmárkana Poulsbo báikkis gos muittašedje ja gudnejahtte *Manitoba* ekspedišuvnna čuohtejagi doaluid. Dát gárttai maid šaddat oabbá-gávpoga dáhpáhussan Guovdageainnu ja Poulsbo gaskkas ja čádahuvvui ge odđa illudeaivvadeapmi Alaska-sámiid maŋisboahttiid ja máŋgga Sámi fulkkiid gaskkas. Mimi láhttestii "olles vahkkoloahppa lei munne áibbas jorrbodahtti." Sii deive Guovdageainnu fulkkiideaset áibbas vuosttas hág, geat dan seammás áice ahte Mimi ja su áhči leigga sidjiide sogalaččat. ("Lean du goalmmát vilbealli, oarpmealli duon ja dán sohkalinjá mielde"). Beasai muosáhit njálmmálaš árbevieru mii ii leamaš oassin su mánnávuoda diliin. Fuomášii maid kultuvrralaš erohusaid amerihkálaččaid ja Sáme-eatnama sámiid gaskkas, muhto beroškeahttá das, son "dovddai iežas čadnon daidda." Sámi guossit maiddái čájehedje máŋgii dán vahkkoloahpa mielde ahte sii dov-det iežaset gullamin muinna oktii go ganjalčalmmit oid-nojedje goappašiid bealde, ja go Guovdageainnu sámenissonat salastalle mu ja celke "don leat sámi nieida". Okta fulkkiin juoiggadii su ja olbmot bivde su gárvodit sámi biktasiidda, cogat gávtti badjeli. Dáid vásáhusaid hárrái celkkii "Dát váikkuhii munne nu erenoamážit, gapmon gullevášvuoda dovddu, in leat dušše *Heinz 57*, gulan gosa nu." Dán deaivvadeami maŋjá čálašin muhtin áiggi moanaid fulkkiiguin muhto "oktavuođat leat vágidoahtán áiggi mielde".

Namahuvvon girji lei beavddi alde orrumen ja go čujuhasttii dasa, dajai, "dát girji lei duođaštus, lei addo dat mii munne čilgii gii mun lean". Son vel nuppádas-sii dadjalii mo girji ii lean buresboahtin ja čujuhii dasa

mo amerikhá indiánaid birra lea čállon, ja maid son lei oahppan cuiggodit iežas amerikhá indiána dutkan-kurssain maid čáđahii allaskuvillas. "Dahkamušsan lei vuostáiváldit dieduid, geavahit daid alcces buorrin iige ruovttoluotta addit maidige". Muitalii sullasaš dynamihka birra nuppi dilálašvuodas Nordic museas gosa moadde Sámis boahtán sápmelačča ledje bovdejuvvon buktit sáhkavuoruid. Doppe ledje maiddái máŋga eará olbmo geat dovddahedje iežaset sáme-amerikhálažžan."

Okta nieida (gii anii iežas amerikhá sápmelažžan) válldi sátnevuoru ja hállagodii sus lea višuvdna mas sámi šamána boktá su ihkku. "Sámit geat ledje boahtán Sámis maid ledje das ja mun dovdagohten iežan hui njáigun inge háliidan gullat sin jokvui (nuppiid sáme-amerikhálaččaid jokvui). In hálit mátkkoštít Sápmái dego muhtin eahpeheivehuvvon, dego "new age" olmmoš. Hálidan dohko vuolgit nugo mun ieš lean. Juoga láhkai oidnen dán dego livčče *Vilgesat* geat bohte indiána báikegoddái ja dajašedje "mu áhku áhkku lei Cherokee prinseassa". In hálit romántiahttít.

Mii munnje eanemusat čuozai dán gávnadeamis, geavai dalle go leimme loahpaheamen munno virggálaš jearahallama, go geigii munnje báhpára maid lei čállán ovta Canadian Studies kursii allaskuvillas. Dutkan-báhpáristis son čálli Alaska sámiid oppalaš historjjá, sin sisafárremis ja sin vásáhusain manjá Alaska. Su professor lei miedihan ja suovvan su hábmet báhpára álgosániid dego reivve Mimi áhčibeli áhkui vai nu "livčče gávdnan su jienä". (Oaniduvvon oassi dán reivves lea oaidnimis engelasgillii ilbman girjjis *We Stopped Forget-*

ting). Manjá go ledjen lohkan reivve, jerren sus movt "indigenous" lea sutnje dál.

Háliidan dovdat iežan erenoamážin, ja juohkehaš dárbbasha oktiigullevašvuoda. Dovddan oktavuođa muhtin láhkai, lea dovdan ja diehtin maid ii oktage sáhte váldit mus eret. Ii oktage sáhte mu dubmet, dát lea mu veaddá, dát leat duođat, ja dát leat mu máttut. Muhto risttalážžan balan maid, ja lei áigi goas ohcen vuoinjalašvuoda ja várra maid seavdnjadaga. Soames bealit oskkus, eai oro leamen bargamin mu beale. Risttalášvuhta munnje ii leat ahte váccášin goappašiid guvlui. Mun ain gudnejahtán daid muhto in sáhte daid sehkket.

Manjá manjumuš jearahallama Mimiin, moai deaivvadeimme moanaid háve joatka-ságastallamiidda. Su vánhemat gallegedje Guovdageainnu 2004:s gos soai deaivvadeigga máŋggaid fulkkiiguvin vuosttas gearddi. Doppe maid odđasit čanaiga oktavuođa daidda geaid leigga deaivan čuohtejagi ávvudeamis 1998:s. Soai beasaiga oaidnit áhku-áhku riegádanbáikki. Mimi lea gieskat dahkan oktavuođa ovta Puget nuori báikegotti vuorrasut nissonii gii lea gávnahan ahte son dáidá leat Alaska sápmelaččaid manjisboahti. Dán oktavuođa boadusin lei ahte nisu ja Bill Willcox leaba čáđahan jorbabeavdeságastallama Sons of Norway báikkálaš ossodagas gos háleztedje Alaska sámiid vásáhusain.



BÁIKI riikkaid-gaskasaš sámi áigecála

Báiki-nammasaš áigečála lea ilbman Amerihkás gitta 1991 rájes. Dan doaimma headdji leamaš álggu rájes Faith Fjeld. Faith gullá mätta-sámi sohkii, muhto lea sihke riegádan ja bajássaddan Amerihkás. Son lea okta válđo-olbmuin geat leamaš mielde ealáskahttimin sápmelaš-dovddu ja identitehta amerihká sápmelaš mańisboahttiid gaskkas mańimuš moaddelot jagiid.

Dán giđa almmustuvai áigečállaga 36. nummir. Dasa lea bidjan nama "The New Generation". Arтихkkala, masa namma čujuha, lea Faith mánáidmánna Ruby Kark-French čállán, ja čállosa fáddán lea oahpahusa dekoloniseren. Dekoloniseren leamaš ge mańimuš nuppelot jagiid guovddáš áššin hui olu álgo-álbmotdutkamis ja oahpahusas. Akademija dekoloniseren-jurdagis lea vuolggahuvvon sierra lahkanan-vuohki dutkamii, man gohčodit álgoálbmotmetodologijian. Dan vuodđun lea álgoálbmogiid iežaset ádden- ja dulkonvuogit. Álgoálbmotmetodologijii gullá sihke dutkan, etihkka ja kritihkka. Dássázii ii leat siskálđas kritihkka ožzon nu olu fuomášumi go dutkan- etihkka ja góibádusat earáide. Muhto dađe mielde go suorgi ahtanuššá, das dieđusge ovdána kritihkalaš beallí ge. Dan dihtii lea miellagiddevaš dakkár servvilde go Sámi fágalaš girječálliid ja jorgaleaddjiid searvái čuovvut álgoálbmotmetodologija ovdáneami – dan

dihtii go searvvi doibmii gullá kritihkka ja diehtelasat etihkka ge. Lea somá registreret ahte *Báiki*-áigečála ge fuomáša ja fuomášuhttá odđa dutkansuorggi, go dan mearkkaupmi jáhkkimis ain lassána ovddosguvlui.

Mańimuš nummiriin leamaš nuppi siiddus fásta čilgehus áigečállaga nammi, duogázii ja doibmii. Báiki logo lea Faith ieš hábmen. Das geavaha (nugo oainnát govas das bálddas) noaiderumbbu goavid, maidda lea mearridan sisdoallun: Boazu symbolisere birgejumi, lávvu bearraša ja fulkkiid, várri duogábealde gove eatnama eadnin, ja njalla gis gove árbevirolaš máhtu boahttevaš buolvvaide. Faith lea dál barggildeamen ráhkadir čoakkáldaga Báikki buoremus artihkkaliid vuodđul. Čoakkáldat lea jurddašuvvon girjin ilbmat.

Sámis doaivu mańit nummiris sáhttit fállat jearahallama Faith Fjeldain, su májggabealat doaimmaid birra amerihká sámiid iešdovddu loktema barggus, seammás go mii maiddá geahčastit mo *Báiki*-áigečála leamaš mielde čatnamin oktavuođaid ja gaskkusteamen dieđuid sápmelačaid gaskkas goappat bealde Atlántta.

Faith Fjeld govejuvvon muhtun Idle No More lágidea- mes Duluth góvpogis Minnesotas. Liidni mii sus lea badjelis lea skeanča maid lea ožzon muhtun Davvi-Amerihká Sámíráđi lahtus, geas lea nuortalaš duogáš. Su áhkku dagai liinni 90-jahkásazjan.





Brad E. Nelson lea silbarávdi gií
ráhkada sámi mállet činjaid. Son
lea dan gova dahkan.

Buorre eallin ja dan dutkan

Lehpet go gullan muiatalusa indiána birra gií čohkái jávregáttis ja oakkui, go de boahtá entrepreneavrrálaš vilges almmái suinna háleštit. Vilges almmái diedus vierustis mielde jearrá indiánas:

- Na, maid dal don? Indiána geahčá apmasit vilges albmái ja imašta ahte ii bat oainne maid son lea, de vástida oanehaččat:
- Oaggumin.
- Na, dan mun gal oainnán, muhsto lea go dat rivttes áigegeavaheapmi dus?

Indiána ii vástit dasa maidige, dušše vuorddaša ahte galggašii guolli dohpet ja vilges almmái jávkkodit. Vilges almmái joatká:

- Dus galggašii vanas, de beasašit fávlelii. Doppe sihkkarit lea eanet guolli.
- In mun dárbbaš nu olu guliid, indiána vástida.
- Muhsto jus fidnet olu guliid, de sáhtat vuovdit daid maid ieš it dárbbaš, ja de sáhtat oastit stuorát fatnasa, vai bivddát vel buorebut.
- Muhsto dalle han in astta šat čohkkát dás, bivddašit ja smiehtadit, indiána láhtttesta.
- Na, dalle dušše bálkahat earáid bivdit du ovddas dan borta. Dalle leat ordnen earáide ge bargosajiid, de sáhtat buriin oamedovduin dás čohkohallat.

Ii indiána diehtán ahte sus livčii moktige galgan leat fuones oamedovdu dan dihtii go čohkkái jávregáttis ja bivddašii, ii ge ahte lei su geatnegasvuohta ráhkadit earáide bargosajiid. Ii han sus alddes ge lean bargu, eará

go birget beaivvis nubbái. Ii ge son ádden vilges albmálogihka das ge ahte manin son galggai nu olu joavdelasaid rahččat dušše dan dihtii ahte beasašii bargat dan seammá maid jo muđui ge hálidii dahkat.

In áiggo maidige čiekŋalis analysaid evttohallagoahtit muiatalussii, muhsto vásáhusa sáhttá atnit kulturerohusaid ja goappatlágan eallinoainnuid govvádussan. Vilges olmmoš lea nu báidnon lutheralaš-protestanttaláš bargomorálii ahte easkka sáhttá vuoinjastit go diehtá ahte son tine bures vai sáhttá birget bures. Indiána gis diktá luondu mearridit. Diedán bures ahte dát leat stereotipiijat álbumogiid birra, muhsto muiatalusa lea vejolaš geavahit jearrat mii duođaid lea Buorre eallin?

Visot iskamat han čájehit ahte álgoálbmogat eai veaje bures, min birgejupmi lea heittot, gaskamearálaš eallinahki vuollin, tienas lea fuotni ja sosiála váttisuodat leat eatnat. Dákkár guorahallamat leat dehálaččat, in mun vuostálastte daid, muhsto arvvan dattege jearralit ahte makkár mihttomeriid ja eavttuid ektui leat dat iskamat dahkkon. Gean meroštallan lea vuodđun dasa ahte mii adnojuvvo Buorre eallimin?

Jearan ee. dan dihtii go 2012-geasi ledjen mun stuorra riikkaidgaskasaš konferánssas Aotearoas, mas okta fáddá lei juste *Buorre eallin – Well-being*. Okta Jaskesábi sullo álgoálbmot dutki jorgalii olles gažaldaga vulosoivviid logaldagastis. Son jearai mo livčii jus bijašii gova

nuppegežiid. De sahtášii jearrat: Leat go oarjemáilmomi kultuvrrat geafit dan dihtii go sin eallimis eai šat gávdno dat bealit mat dahkat álgoálbmot kultuvrraid rikkisin: bearašlagasvuhta, ovdavánhemiid gudnejahttin, sere-monijiaid bajásdoallan, lávlun ja reaškkas, lahkuvuhta lundai ja luonddugáhppálagaid árvvusatnин.

– Buot dutkamušain orru leamen a priori eaktun oarjemáilmomi meroštallan das ahte maid mearkkaša leat geafi, son lasihii. – Jus mus leat unnán ruđat, muhto mun ieš ja mu lagamučat birgejít bures, mis lea orrunsadji, buohkat leat dearvasat, mánát illudit, olles siida veadjá bures, eai leat riiddut olbmuid gaskkas. Muhto de boahá olggobeal-dutki ja gávnnaha ahte mu servodat, mu siida, gullá geafimusaid gaskii olles máilmes dušše dan dihtii go mis ii leat ruhta-ekonomija. Son dáidá maiddá jearahallat guovllu eiseváldiig geainna lea ovdagáttut mu siidii, de háddašeaddjít duođaštit dutki áddejumi ahte mu siida lea geafi. Oarjemáilmomi mihtuid mielde mearkkaša leat geafi seammá go ahte birge funet. Dasto manná dutki muhtun riikkaidgaskasaš konferánsii bukit ovdan iežas iskosa, ja govva bisána guldaleaddjiide ahte mu servodagas lea fuones dilli, vaikko min iežamet mielas ii leat dan.

Ja álgoálbmot dutki jortkii: – Guokte lagi manjil manan mun seammalágan konferánsii ja čilgen ášši áibbas nuppegežiid. Muitalan man buorre servodat mis lea go ain oažüt vejolašvuoda ealihit iežamet árbevieruid, mii dahká dan ahte siida-lahtut vedjet bures ja olbmot leat lihkolačcat. Vilges dutki maiddá lea seammá konferánsas ja jearrá hirpmástuvvamiin ahte mii lea dáhpáhuvvan mu servodagas guovtti jagis mii dagaha dan ahte eallindilášvuodat leat nu buorránan ja ovdánan. – Ja mun dieđus vástidan, lasihii álgoálbmot dutki, – Ii mihkigie, muhto don it astan oaidnit mo mis lei. Du čalbmeglásaid čáda oainnát áibbas eará go maid min luondduvídá čalmmit oidnet.

Manjil logaldaga mun dearvvahin albmá ja muitalin dien indiána muitalusa sutnje. – Juste nie han lea ge, son duođaštii. Ean goabbáge oppa vikka ge čiegadit ahte májgga sajes máilmes lea álgoálbmogin heajos dilli, muhto dat measta juohke áidna dilálašvuodas vuol-

gá das go sii leat koloniserejuvon. Manjil go kolonisttat leat viggan jorahit álgoálbmogiid vilges olmmožin, iežaset lágánin. Álgoálbmotservodagain eai lean nu olu sosiála váttisvuodat ovdal – dieđus ge lei gaskamearálaš eallinhaki vuollin, muhto dan lei buot álbmogin ovdalis áiggiid. Vilges olmmoš hálidiii leat buorredáhtolaš ja loktet álgoálbmogiid bajit birgenláhkái, muhto juoidá manai áibbas boastut dan proseassas. Ja dán áigái vel min iežamet dutkit ge muhtumin orrot geavaheamen seammá paramehteriid, dutkanvugiid ja statistikhaid duođaštit man heajos dilli mis lea. Diedán ahte gávnojít dievva vuostejearaldagat: Praktiserejuvvojít go šat diet árbeviolaš bealit otnáš álgoálbmotkultuvrrain? Ja dat han dat addo lea ge ášši: Jus dan eai daga, de soaitá justé dat leat váldosivva dasa go álgoálbmotservodagain leat váttisvuodat. Ii ge čoavddus dieđus leat máhccat doložii, muhto muhtumin lea dutkiide dárbu bisánit ja smiehtastit man lahkananvuogi geavahit go dutket álgoálbmotservodagaid. Dán áigái leat ovddideamen álgoálbmotmetodologija dahje indigenismma, mii lokte min iežamet árbeviolaš máhtu árvvu, ja viggá ohcat odđa vugiid mo buorebut máhttit fuomášit gokko dutki ieš ferte čalbmeglásaidis lonuhit oaidnin dihtii dan maid su metoda dássázii lea čiehkan su ovddas.

Juoidá boatkanii go oarjemáilbmi vikkai loktet álgoálbmogiid alit kulturdássái. Dat bilidii olu eanet go dagai buori. Lea go dan šat vejolaš njulget? Mun eahpidan dan, muhto mun maiddá eahpidan dutkama mii ii váldde vuhtii álgoálbmogiid iežaset áddejumi, muhto baicce navdá iežas geavahit neutrálá dutkanvugiid. Dálá neutrálá dutkanvuogit leat dábálačcat seammá go vilges olbmo definišuvnnat máilmes. Mun jáhkán ahte lea dárbu astat čohkanit jávregáddái smiehtadit áššiid. De dáidit maid diehtit buorebut maid vástidit vilges albmái go boahá sivahallat min leat eahpeoamedovddolačcat go "láikošat" jávregáttis. Jus jo it leš min jávregáddi dássázii sirdásan viesu sisa, govvan seainnis mas oaidnit gávtthasa, vai leš go indiána, čohkohallamin beaivvášluoitádeames.



Giellajápmin-diagnosat ja "manjimuš giellahálliid" ohcan

Áitojuvvon gielat ja kultuvrat leat gánnáhahti fidnut dutkiide. Prošeavttat álggahuvvojit ja fierpmádagat vuodđuduvvojtit, gielladutkit ja antropologat vigget leat rivttes sajis go muhtin giella dahje kultuvra "lea jápmimin" dahje go daid galgá revitaliseret (ealáskahttit). Erenoamážit gávdno gielladokumenterema suorggis dutkandoarjja maid sahttá ohcat jos áigu dokumenteret giela mii lea jávkamin.

DÁRKILIS LOGUT MAT MEARRIDIT GIELAID "EALASVUOÐA"

Organisašuvnnat nu mo UNESCO (2010) ja Ethnologue (2013), almmolaš guorahallamat ja dutkanraporttat buktet dábálaččat dárkilis loguid giellahálliid birra ja juhket máilmimi gielaid iešguđet ealasvuoda-kategorijjaide – buot gaskal "nannosat" ja "jápmán". Jos olmmoš ii gávnna iežas giela dáid katalogain, de lea stuorra vejolašvuhta ahte giella lea "jápmán"....

Man sihkkarit sáhttit mii rievtti mielde diehtit man ol lu hállit ovtta gielas leat? Makkár giellamáhttu ferte olbmos vai adnojuvvo vásedin giela hállin? Lea go giella, mas leat mángaduhát hálli, automáhtalaččat nanus? Ja jos gielas leat unnán hállit, máksá go dat ahte giella lea jápmimin? Dát leat jearaldagat maid diehttelasat ii sáhte vástidit oanehis artihkkalis, muhto daid berrejít dutkit, politihkkárat ja journalistat atnit muittus go celket juoidá áitojuvvon gielaid dili birra. Erenoamážit go cinnostit dáid gielaid boahtteáiggi. Leat váttisvuodat čadnojuvvon dasa ahte geavahit konkrehta loguid go govvida gielladiliid, erenoamážit go lea sáhka unnitologu álbmogiin, go dušše smávva boasttuvuođat sáhttet čuohcat giela ealasvuhtii, sihke teorijjas ja praktihkalaččat.

GO (BOASTUT) ÁRVVOŠTALLÁ GIELLADILI
Gielladutki Nikolai Vakhtin (2001: 264, 265) buktá dievva ovdamearkkaid das mo álgoálbmot- ja unnitálbmogiid gielat leat ceavzán gitta otná beaivái, vaikko sihke etnologat ja gielladutkit geat leat fitnan dáid giella-joavkkuid luhtte badjel čuohte jagi juo, leat čuoččuhan

– Hástalusat ja ehtalaš ovddas-vástdus unnitgielaid dutkamis

ahte sihke gielat ja daidda gullevaš čearddalaš joavkkut gal jávket dušše buolvva geahčen (omd.: jukagiragiella, itelmengiella, korjakigiella). Giellamolsunfenomena lea eahpitkeahttá máilmiviidosaš váttisvuhta. Máŋga máilmmi gielain leat hui hearkkes dilis, go hállit leat baicce hállagoahtán stuorit gielaid main lea eanet stáhtus, nu mo enjelasgiella, spánskkagiella, ruoššagiella, dárogiella, ruotagiella jnv. Ja vaikko lea ge dál stuorra giellamolsunproseassa, de dat ii dárbaš mearkkašit ahte giella jápmá ja oalát jávká.

OKTAGEARDÁNIS GIELLAOIDNU

Leat iešguđet oainnut gielaid dili hárrái. Dušše definišuvnnat das mii giella lea sáhttet spiehkastit, sihke dutkiid gaskkas ja giellaservodatlahtuid gaskkas (olbmot geat identifiserejit iežaset sierranaš gielain). Go gielladutkit oidnet giela vuostazettiin grammatičkalaš ja struktuvralaš fenomenan, eai ge váldde vuhtii sosiála, politihkalaš, kultuvralaš, historjjálaš ja psykologalaš konteavstta mas giella hábmejuvvo ja ovdána, de lea sakka stuorát várra das ahte sáhttet šaddat boasttu-árvvoštallamat. Váttisvuodat maiddái čuožžilit go dutkit badjelgehčet oainnuid mat olbmuin, geat identi-

fiserejit gielain, alddiineaset leat iežaset giela ja dan ealasvuoda hárrái.

GIELLAJAVAHEADDJI OAUDNE-MEAHTTUNVUOHTA

Unnitgielaid oktavuodas eanas giellageavaheaddjít eai oidno servodagas, erenoamážit jos gielas lea unnán stáhtus. Eanas olbmot guđet geavahit unnitgiela beaivválaččat, dábálaččat eai searvva sosiála, politihkalaš dahje kultuvralaš eallimii, juoga mii dakhá sin oaidne-meahttumin, erenoamážit olggobeale olbmuide geat eai dovdda dan giellaservodaga bureas. Dutkit eai álo ge fuomáš vejolaš giellageavaheaddjiid eanetlogu (olbmot geain lea iešguđet dásí giellamáhttu muhto eai geavat giela aktiivvalaččat), nuorat buolvva (30-), olbmuid geain lea unnán sosiála stáhtus (omd. psyhkalaš buohcicit, juhkit ja nu gohčoduvvon "asosiála" olbmot) ja eará čearddaid olbmuid geat máhttet áitojuvvon giela.

Sii geat leat eanemus oidnysis unnitlogugielaid oktavuodas leat politihkalaš njunnožat ja kulturjodí-headdjít, olbmot geain lea alla sosiála stáhtus, giellaceahpit (oahpaheaddjít, giellageavaheaddjít geain lea

Biologijas jápmín lea juoga mii lea loahpalaš ja mii dáhpáhuvvá lunddolaš sivaid geazil, ...

alla oahppu, boarráset giellageavaheaddjit geat beroštít giellaárvvus jnv.) ja sii geat aktiivvalaččat barget giella-ealáskahttimiin. Olggobeale dutkit beroštít dávjá dán joavkku representašuvnnas. Dát olbmot dávjá fállet iežaset diehtoaddin ja oktavuođaolmmožin, sii "dovdet olles servodaga" ja muitalit dutkái geat hállet giela ja gii ii hála, geainna dutki galgá ovttasbargat ja geasa "ii gánnet geavahit áiggi" (gč. Evans 2001). Go dutkis lea váilevaš giella- ja kulturmáhttu ja dovdá iežas eahpe-sihkarin amas kultuvrras, de lea vuogas doahttalit ovttaskas olbmuid geat doibmet servodatofelažan. Jos ofelaččat menddo sakka stivrejít gieddebarggu, de dutki sáhttá oažžut menddo oktageardánis ja váilevaš oainnu gielladilis.

DUTKI JA GIELLASERVODAT

Dutkiin, geat dávjá leat olggobeale olbmot ja bohett amas servodahkii, leat máŋgii ovdagáttut das mo giellaservodat doaibmá. Dát sáhttá váikkuhit dutkanbohtosiidda. Váilevaš máhttu servodaga mekanism-maid birra, váilevaš giellamáhttu ja oanehis teknihkalaš dutkangalledeamit, goas dutkit eai beroš eai ge váldde oktavuođa olbmuiguin geaid gielladili leat dutkamin, dagahit gaskka dutkiid ja "dutkanobjeavttaid" gaskkas, juoga mii fas dahká ahte guorahallamat šaddet menddo coahkásat.

Govva objektiivva dutki birra, geas lea neutrála posíšuvdna servodagas gos son lea dahkamin guorahallamiid, lea boares myhta mii ii vástit duohtavuhtii. Juo dalle go gielladutki čájeha beroštumi muhtin áitojuvon gillii ja ihtá giellaservodahkii, de dát váikkuha gie-la stáhtusii, olbmuide ja servodatproseassaide. Danne lea hui dehálaš ahte dutki álo jurddaša kritihkalaččat

iežas rolla birra ja man láhkai dat sáhttá váikkuhit dutkanbohtosiidda ja olbmuide geaiguin leat bargamin. Dát guoská maiddái dutkiide geat ieža gullet muhtin álgoálbmogii dahje unnitlogu álbmogii. Vaikko vel lea seammá čearddalaš vuodđu go sis geaid dutki lea guorahallamin, ii másse dan ahte dutkis lea eamimáhttu diiliid birra maid son lea guorahallamin, ii ge leat mihkke dáhkádusaïd dasa ahte láhtte ehtalaččat riekta.

BADJELGEAHČČAN

Boastu dieđut áitojuvvon gielaid ealasvuoda hárrái sáhttet maid vuolgit badjelgeahččama dihte. Akademalaš málmmis lea alla árvu čadnojuvvon dasa ahte bargat eksohtalaš, áitojuvvon gielaiguin; leat son gii buktá diedü das ahte muhtin giella lea "jápmán" dahje ahte son bargá "maŋimuš hálliiguin". Dávjá áitojuvvon gielat doibmet katalysáhtorin dutkiide geat dáhttöt akademalaš karrieara ja háliidit prošeaktadoarjagiid ja alla stáhtusa. Erenoamáš čállosat ja artihkkalat main vuodđu lea coages dutkanbargu, lea dávjá dakkár oðas man birra ollu mediat čállet ja muitalit.

Sáhttá leat sáhka gilvvus vissis unnitálbmogiid gaskkas jos badjelgeahččá dan ahte muhtin áitojuvvon gielat ain leat eallimin ja daid sáhtášii ealáskahttit: galgá go deattuhit smávva gielaid Norggas, nu mo nuortalaš-sámegiella? Dahje ubmisámegiela Ruotas? Ii go leat hálbbit ahte ubmesámit baicce ohppet máttasámegie-la ja ahte sii geat háliidit oahppat nuortalašgiela fárrejít Supmii? Vaikko muhtin dutkit čuočuhit ahte nuortalaš-sámegiella ja bitonsámegiella eai leat ealli gielat Norggas odne (Feist 2010: 19, 20, Vangsnes 2012), de ii leat dáid gielaid dálá dilli guorahallojuvvon. Mii eat dieđe leat go odne olbmot Norggas geat máhttet biton-

*... muhto giela dáfus politihkalaš,
ekonomalaš ja persovnnalaš dilit
maid mii olbmot ieža dagahit,
mearridit jos giella adnojuvvo vai ii.*

ja nuortalašsámeigela, dahje leat go olbmot geat identifiserejít iežaset dáid gielaiguin dahje geat hálidivčče ealáskahttit daid.

DUBMET GIELA

Jápminduomut maid dutkit, politihkkárat, eiseváldit ja riikkaidgaskasaš organisašuvnnat celket, sáhttet hoahpuhit giellamolsunproseassaid ja buktit negatiivva sosiál-psykologalaš váikkuhusaid daidda olbmuide geat identifiseret iežaset jápmínčilgejuvpon gielaiguin. Giellaservodatlahtut sáhttet jurddašit ahte lea veadje-meahttun váldit ruovttoluotta iežaset giela, ja dan dihte eai geahčéal ge álgghahit ealáskahttindaimmaid. Vejolaš giellageavaheaddjít eai dáidde geavahit iežaset máhtu dahje sii ollásit hilgot dan. "Jápmán" gielat dábálaččat eai oaččo makkár ge politihkalaš dahje ásahuslaš doar-jaga. Ii biton-, ubme- dahje áhkkilsámeigelas leat omd. makkár ge sajiid riikkaidgaskasaš sámi giellalávdegottis, ii ge leat makkár ge váikkuhanváldi sámi giellapolitiikas. Teorehtalaš jápminduomut ja pessimistalaš árvalusat sáhttet johtilit dagahit praktihkalaš loahpalaš giellamolsumiid. Danne lea dutkiin, politihkkáriin ja eiseválddiin stuorra ovddasvástádus go celket juoidá áitojuvpon gielaid ealasuoda hárái.

GIELAT EAI JÁME, GIELAT MOLSAŠUVVET – VEL RUOVTTOLUOTTA GE

Odne eanet ja eanet erenoamázit giellasosiologat gehččet kritihkalaččat giellajápminmetafora. Gielladutki Jon Todál oaivvilda omd. ahte ii sáhte hállat giellajápmima birra seammaláhkai go hálla jápmima birra biologijas. Biologijas jápmín lea juoga mii lea loahpalaš ja mii dáhpáhuvvá lunddolaš sivaid geažil, muhto giela dáfus politihkalaš, ekonomalaš ja persovnnalaš dilit maid

mii olbmot ieža dagahit, mearridit jos giella adnojuvvo vai ii. Danne go álo lea vejolaš rievdadit dákkár diliid, de lea maiddái álo vejolaš nuppástuhttit giellamolsunproseassa. Jos olbmot hálidit váldit ruovttoluotta iežaset giela ja jos leat okta dahje eanet olbmot geain lea giellamáhttu, dahje jos giella lea dokumenterejuvpon, de lea vejolaš dan ealáskahttit (Todal 2008: 127).

VÁLDIT GIELA RUOVTTOLUOTTA

Iešguđet álgoálbmotjoavkkut anglo-amerihkálaš málmmis (omd. wópanâak, ohlone och myaamia) geavahišgohtet fas máttarmáttuid "oaddi" gielaid, mat eai leat geavahuvpon guhkes áigái (*language reclamation*). USAs ja Kanadas moanat akademalaš ásahusat ja dutkit ovttasbarget álgoálbmogiiquin ealáskahttin dihte sin giela (omd. University of Victoria, MIT). Bures lihkos-tuvvan prográmma *Master-Apprentice Language Learning Program*, mii vuodđuduuvvui California universiteetas Berkeleyas USAs, lea yeahkehan mánjgaid gielaid main leat unnán giellageavaheaddjít, sihke bajdit sin stáhtusa ja lasihit aktiivva giellahálliid logu. Unni-musat 50 tiimmu mánntu, oktiibuot golmma jagis, oah-paha muhtin gii máhttá giela (giellačeahppi) oahppi, oktasáš beaivválaš doaimmaid bokte main dušefal áitojuvpon giella adnojuvvo. Prográmma dakhá vejolažžan dušše ovttain hálliin álgghahit ealáskahttinproseassa mii de fas álgghaha ráidoreakšuvnna mas olbmot ealáskahttet sin oaddi giellamáhtu dahje sii ohppet giela gittra álggu rájes (Hinton & Hale 2008: 217–226).

Australias, USAs ja Kanadas fertejít dutkit ohcat lobí álgoálbmogii jos áigut čáđahit gieddebarggu álgoálbmotservodagain. Kontrávttas mii dakhko, dutkit ja ásahusat máidda sii gullet, leat geatnegahtton árvvus at-

nit ehtalaš njuolggadusaid ja čádahit dutkama mas lea praktihkalaš ávki servodagaide maid leat guorahallamin. Eurohpás gis čádahuvvo álgoálbmot- ja unnitálbmogiid dutkan ain measta beare dutkiid eavttuid mielde, dain-na jurdagiin ahte teorehtalaš dutkan automáhtalaččat lea ávkkálaš daidda servodagaide maid guorahallet. Sátnegirjjit ja grammatihkkagirjjit mat leat čállojuvvon riikkaidgaskasaš dutkanservodaga várás engelasgillii dahje eará gillii mii ii leat áddehahti dutkojuvvon servodaga álbumogii, ovddidit diehttelasat dutkiid karrie-raid, muhto dain lea unnán ávki giellaservodaga mielahtuide geat dárbbasit materiála maid praktihkalaččat sáhtrá atnit. Audio-materiálat ja filbmejuvvon materiálat fertejít leat sadjosis rivttes ehtalaš vuogi mielde, ja fertejít leat heivehuvvon nu ahte daid sáhttá geavahit ealáskahttinbarggu.

Dáinna čállosiin in oaiivil ahte buot gielladutkit galget bargat sosiolinguisttalaš ealáskahttindutkamiin dahje doaibmat giellaaktivistan. Giellastruktuvrraid ja grammatihka dutkamat leat maiddái dehálaččat ja dain sáhtrá stuorra ávki servodagaide maid dutki lea guorahallamin. Eaktun dása lea ahte giellaservodagas lea vejolašvuhta geavahit dutkanbohtosiid, ja ahte sii geat identifiserejít áitojuvvon gielain adnojuvvujit árvvus ja besset searvat dutkanbargui. Dán oktavuodas lea mis, eurohpá dutkiin ja dutkanásahusain, ain ollu oahepan láhkai iežamet australia ja angloamerikálaš bargo-ustibiin.

GÁLDUT

Evans, Nicolas 2001: The last speaker is dead – long live the last speaker! I: Newman, Paul, Martha Ratliff (eds.):

Linguistic Fieldwork. Cambridge University Press. (s. 250–281).

- Feist, Timothy Richard 2011. *A Grammar of Skolt Sámi. [Thesis]*. Manchester, UK: The University of Manchester.
- Hinton, Leanne & Hale, Kenneth (red.) 2008. *The green book of language revitalization in practice*. Emerald. Bingley UK.
- Lewis, M. Paul, Gary F. Simons, and Charles D. Fennig (eds.), 2013. *Ethnologue: Languages of the World, Seventeenth edition*. Dallas, Texas: SIL International. Online version: <http://www.ethnologue.com> (hämtad 05.03.2013).
- Moseley, Christopher (ed.). 2010. *Atlas of the World's Languages in Danger*, 3rd edn. Paris, UNESCO Publishing. Online version: <http://www.unesco.org/culture/en/endangeredlanguages/atlas> (hämtad 05.03.2013).
- Scheller, Elisabeth 2011. Samisk språkrevitalisering i Ryssland – möjligheter och utmaningar. I: "Norsk og finsk-ugrisk språkkontakt i Norge." *NOA: norsk som andrespråk 1-2011*. Universitetet i Tromsø. (s. 86–118).
- Todal, Jon, 2008. Når er eit språk forsvunne? Kritiske merknader til språkdødmetaforen. I: (eds.) Lars-Gunnar Larsson and Torbjörn Söder, *Váimmus čiegan sániid –I hjärtat gömmer jag orden*. Uppsala: Institutionen för moderna språk, Uppsala universitet. (s. 124–130).
- Vakhtin, N. B. 2001. *Jazyki narodov Severa v XX veke. Očerki jazykovogo svibga*. Evropejskij universitet v Sankt-Peterburge.
- Vangsnes, Øystein A. Pitesamisk – eit forsvinnande lite språk i Skandinavia. I: *Forskning.no: nettavis med nyheter fra norsk og internasjonal forskning*. 06.02.2012. Universitetet i Tromsø: <http://www.forskning.no/blog/vangsnes/312544> (hämtad 05.03.2013)



Erenoamáš árbevieruid dokumentára

Marit Mikkelsdatter Eira Murud

Jahki Sámis


Girji muitala mo sámit leat birgen ja mo leat birgejumi viežžan luonddus, luondu ja luondu elliid rievdama áigodagaid mielde. Girjis leat šattuid birra, maid sáhttá borrat ja maid fas dálkkasin geavahit.

Dálkediiddat ge leat miellagiddevaččat. Odne mii oaivvildat diet eai šat doala deaivása nu mo ovdal, go dálkkádatrievdan váikkuha lundai, ja olbmo eallimii Sámis.

Dieđut leat biddjon juohke beaivái miehtá jagi. Nu lea ge girji erenoamáš sámi árbevieruid dokumentašuvdnan.

ISBN 978-82-8263-047-4

150 s. Garra olggoš. NOK 250,-.



Suoidnemánnu • Vahku 27 • Loddelámvahkku/Loddelápmi

2



Geassi álgá.



Jus odne arvá, de arvá guhtha vahku ovddos-guvlui.



Čuonjá láhppá sojiid, loddelápmi, nappo láhppá soajedolggiid ja de saddagohtet odđa dolggit sadjái. Dat ii sáhte girdit dolgelonuhanáiggi, gč. 15.06.



Giron čivgá dáid muttuid, dahje geassemánu loahpas, go gironbárra vuos lea lállán moniid sullii golbma vahku. Čivgat girdilit sullii golmmavahkkosažžan.



Dáid muttuid gorgnejit vaikko makkár sturrosaš luosat mearas čázágadaide. Stuorámus luosat leat ovddemus gorgjen, ja dađistaga vulget smávit guolit, linddorat ja luosjuolggit.



Ohcejoga ja Kárášjoga sápmelaččat lávejedje suoidnemánnus giddet Deanu rastabuođuin go bivde luosaid. Dát bivdovuohki ii leat anus leamaš 1860-logu rájes. Anáraččat leat maid geavahan dán bivdovuogi Anárjogas.



3



Oapmedáloolbmuin álggi ráhkkananáigi lájuide. Dalle galge liššát šliipejuvvot, áhcestoalpput ruskejuvvot ja eará biergasat divoduvvot vai leat ortnegis go lájuiguin álge rassat.



Boska lea dáid muttuid juo olles šattus, muhto anihia bures biebmun, earenoamážit fádnut. Dál sáhttá bosket ja ráhkadit gelea, sieráha, marmelade, ja nađain sáhttá sohkarnjálgáid maid ráhkadit. Lasttaid onikada is ...

www.lagadus.org

TjaelijiBerteme

TjállijAlmmudahka

Sániid fápmu jierpmi badjel

Deaddiluvvon ruotagillii Populär Arkeologi-nammasač
áigečállagis 1/2013, s. 19. Jorgalan davvisámegillii Harald Gaski

Manin lea Ruotas nu diehtelas hállat "davviriikkaid gielaid" ja "davviriikkaid oskku" birra, muh-to nu moalkái dadjat "sámegielat" ja "sámi osku"? Ubmi universitehtas lea vejolaš lohkat "davviguovluid arkeologija" muhto Tromssas lohket "sámi arkeologija".

Gaskkohagaid geavahuvvo "norrón" "davviguovlluid" synonyman, muhto dat mearkkaša "davviriikkalaš", ja čujuha erenoamážit ovddeš oarje-davviguovlluid gielaide (geahča neahdas Ruota Akademija sátnegirjji, SAOB). "Skandinávalaš" lea vel eará buohtastahti namahus "davviriikkalaš"-doahpagii, ja speadjalastá várra eangalasgiel váikkuhusa.

Dán áigái gávdnet arkeologat daðis eanet bázahusaid mat duoðaštít sámi ássama geadgeáiggi rájes Gaska-Ruota rájes gitta Mátta-Norgii, main leat čatnosat gitta geadgeáiggi bivdoálbmogiidda. Árbevieru mielde leat dát gávdnosat gohčoduvvon "bivdo-kultuvra" bázahusat, vaikko leat ge seammaláganat go Davviskandinavia "sámi" bázahusat.

Stáhta historjálaš musea Stockholmmas rabai 2001:s "Vikingar"-nammasač čájáhusa. Čájáhusas

ledje guokte montera mainna ledje sámi fáttát. Dás rájes leat monterteavsttain lonuhan eret "sápmelač-čat"-namahusa ja dan sadjái čállán "davvi-álbmogat" dahje "bivdo-álbmogat", ja "sámi" sadjái gis lea boah-tán "davvi". Museaguossit áddejít dan mearkkašit "davviriikkalaš". Váikkuhussan lea ahte sápmelač-čat dahkkojit oaidnemeahttumin dahje sin historjá amas-mahttojuvvo. Lea čielggas ahte ii sáhte dieinnalágiin lonuhit "sápmelač-čat" ja "sámi". Ja "Davvi-álbmogat" han lea oktasač namahus mii Ruoššas gokčá eanet go 30 iešguđetge álbmoga.

Ironálaš bealli dás lea ahte juste vikingaáiggi han sápmelač-čat ledje fámolaš joavku mas fertii beroštit. Sis lei árvu ja ekonomálaš mearkkašupmi. Davviriikkaid gonagasaid ja eará riggáid riggodat han lei huksejuvvon duolljegávppašeapmái sápmelaččiguin. Geadgeáiggi ipmilat, gonagasat ja eará stuorrát, dego aesat, Ynglinge-sohka, Lade-járlat ja Orkneyjárlat han suorgásedje myhtalaš "páras", mas nubbi gulai sámi-sohkii ja nubbi gis davviriikká málbmái.

Romálaš Tacitus čállí jagis 98 guovtti davimus álbmoga birra; *suiones, svealaččat, ja fenni, sápmelaččat*, latinifiserejuvvon dološ oarjedavviriikká-

laš namas finnar. Dat namma ja skridfinnar geavahuvvui čađa olles vuosttas duhátjagi. Germanalaš siida-guimmiid bokte namahusat šadde oahpisin oahppan-olbmuid gaskkas sihke greikka- ja latiinnagillii. "Sápmelaččat" lea álbmoga iežas namahus, mii gávdno 12–1300-logu rájes, muhto mii vissásit lea vel boarrásebbo. 1200-logu rájes gávdno nuortadaviriikkalaš namahus "lappar" čállosiin. Sápmelaččat gávdnojedje Atlántta ábi rájes oarjin gitta Ladoga rádjái nuortan. Muhto sis ii lean čállingiella ii ge sis lean iežaset stáhta.

Mas vuolgá dálááiggi sápmelaččaid oaidnemeahttusin-dahkan? Lea go ballu dulkojuvvot bealálažan? Riekteášshit leat jođus sápmelaččaid vuostá danin go sii hálidit geavahit iežaset árbeeatnamiid. Meahcceuollan, ruvkit, bieggamillut, gumppet áitet boazodoalu.

Áidna mii divošii ášši lea: buoret ja lassi oahpu min álgoálbmoga, sápmelaččaid, birra – jo skuvllas!

Inger Zachrisson lea arkeologija doseanta ja dutká ee. sámi-daviriikkalaš gaskavuoða.



Elisabeth Scheller | Lili Tove Fredriksen jorgalan sámegillii

Muitosánit *Askold Bažanovii*

Gollegumanu 15. b. 2012 jämii gielddasi-kaa áščai áščekki Revda turkesyrovdagas, mii Bažanov lei vuottas zélli Guoladages Askold dovdónde olgebole. Marmánska fykkas. Askold édi tuoslagill, muhto muhtin va teekstadijien ledzeglohevon ja almuhturvon davtsiegellie, diragillie, rotaagillie ja engelagillie. Dir dagu abce son tattai dovdóndum riikkasgaskas liohkkäde.

Askold iastai 79 aagi. Jos delli lei dan made, de son fíastjuohk beačči meahcis ovra su beartagin. Askold iir-ja hírbme burc'ruoiget, mannar bividu, bedit guláđ dan ellid, tattaid ja godgeud.

24 Sámis 12/2013



Askold Bažanov ragidui vuodenemänta 21.ks. 1934 gielddasámi siida. Pieni kene (gielddasámgillii Ristike'dd), mit lei Nostozeto (Nyuu' rjála ur) järve-gittis. Guoladaga gielddas Marmánska fykkas. Oja: Guoladaga Askold väcci tieto skurtagi gitt interiháhkohtas mii lej Ju'kano servodagas. Distro son hengi kollektiiva boazodoftimrodgas sini Vomass siidla, Tukos-nuppi mihammoiadt rádjai. Askolda áhčet jämii sođi álgoggin ja gánda bájastartai iččas emjin ja ádján.

DIVVUMUŠ

Ovddit nummiris (Sámis nr. 12) ledje muitosánit **Askold Bážanovii**, maid Elisabeth Scheller lei cállán. Dađebahábut gárttai okta meattáhus Schellera teavsta jorgalusas: Bažanov namahuvvo das gielddasámi cállin. Dat lea boastut, dan dihtii go Askold Bažanov lei nuortalaš. Son lei riegádan nuortalaš gilážis Ristike'dd (Restikent). Schellera čállosis ledje Bažanov divttat heivehuvvon muitosániide oassin, muhto doaimmahuus sirrii divttaid válđoteavstta eret, mii láivudahtii artihkkala ja divttaid oktiigullevašvuoda. Mii šállošat boastuvuoðaid.

Doaim.

Stuorátgielat báidnet unnitgielaid

– nappa nuppi guvlui?

ležan mielas dát lea miellagiddevaš fáddá, ja universitehta studeantabarggu oktavuođas bessen ge vehá áiggi geavahit dušše dien gažaldahkii ohcat dieđuid ja fástadusaid. Dás mun vuos čájehan mo sámegielas váldit atnui amasgielat sániid, ja muhtin láhkai sámáiduhttit amas sániid. Mun gal jáhkán otná nuoraid sámegiela báidná engelasgiella seamma olu go davviriikkalaš gielat.

Mu čuočehus lea dat ahte www-máilbmi lea dasa váikkuheaddjin. Nuoraid sámegielas leat oahpes sánit dakkárat go **Join, Server, Chat** ja **Game**, daddjojuvvon sámegili nu mo sánit čudjet engelasgillii. Mii sáhttá boastut áddejuvvot, jus omd. váhnen jearrá mánás maid son dahká olles beaivvi, ja mánná vástida **geimen**. Soaitá de

váhnen leamen hui čeavlái dahje heahpanan. Dán ovda-mearkka gullen *Mona Solbakk* koserijas NRK Sámi Radios. Manit oasis dás fas ozan vejolaš dokumentašuvnna dasa ahte sámegiella ge sáhttá leat báidnán siidaguim-miid gielaid. Dásá geavahan professor *Tove Bull* artihkaliiid mas čilge addo dáid vejolašvuodaid birra.

Historjjálaš perspektiiva

Máilmimi historjjás diehit go stuorra ja fámolaš riikkat koloniserejde guovlluid, de daid guovlluid olbmot maiddái šadde bákkuin váldit vuostá sin kultuvrra ja giela. Mu moadde jagi historjáfága lohkamis lea dát cieggan dábalaš fáktadiehtun. Lea dalle maid dovddus dat ahte unnitgielat váldet sániid stuorát gielain ja hei-vehit daid iežaset gillii. Davvirikkaid stuorát gielat leat áiggiid čađa báidnán sámegiela. Sápmelaččat geat orrot Suomas, lunddolaččat váldet atnui suomagielat sániid go galget čilget áššiid masa sámegielas ii gávdno sátñi. Ruota ja Norgga sápmelaččat dahket dan seammá, daid riikkaid sámegielhállit luoikkahit fas sániid ruotagielas dahje dárogielas. Amassánit, dahje internašunála sánit, bohtet maid dalle sámegillii dan riikkagiela bokte gos sápmelaččat ásset. Guldalettiin sámi radiosáddagiid, de gulat fargga lea go suoma, ruota vai norgga beale



Govva: Anne Länsman.

sápmelaš gean lea jearahallamin. Ii ge soaitte leat dušše sániin sáhkka, stuorát davyriikkalaš giella sáhttá leat muđuid ge báidnimin sámegiela. Go mun omd. lohken fágakurssa pensumteavsttaid, de fuobmájin ahte munnje lea olu váddáseappot áddet *Samuli Aikio* fágateavstta go omd. *Thor Frette* teavstta. Jearan dalle alddán ahte lea go dasa sivvan dat ahte Aikio sámegiela lea suomagiella báidnán, ja Frette sámegiela fas dárogiella? Go ieš ásan Norggas, ja dárogiella lea vuosttas amasgiella, de dan si-vas lea munnje álkit áddet Frette fágateavstta.

Odda ja amas sánit sámegielas Loatnasánit

Giđđat 2012 ledjen mun Sámi fágagirjjálaš čálliidja jorgaledđiid searvvi joavkku mielde Baskaeatna- mis oahpásmuvvamin sin gielladiliide. Dát bovtii mu beroštumi giella- dahje sátneluokkaheami áššiide. Baskalaš giellačeahpit muitaledje ahte sin giella lea erenoamáš Eurohpás go das eai leat fuolkegielat. Dat mii lei mu mielas erenoamáš, lei dat go muitaledje ahte 80% baskagiela sániin leat loatnasánit. In leat oaidnán ahte oktage galgá leat dahkan seammalágan loatna- sániid lohkama sámegielas. Dás vuolábealde mun dušše namahan muhtin ovdamearkkaid.

Nállu, mii bodđi Sápmái gávpealmáid mielde, gohčoduvvui vuodđoskandinávalaš gillii **nedlo** dahje, **nádlo**, ja dát lea otne sátni mii orru *álohi gullan* sámegillii, diehtá Thor Frette. Ja otná modearna teknologijjan oažžut mii odđa amas sániid beaivválaččat, eat beare davyriikkalaš gielain, muhto maiddái enjelasgielas. Sánit **Chat**, **Server** ja **Join** álkidit cirret beaivválaš gillii. Ja nu mo sátni **nállu**, de ii ráhkaduvvon odđa sátni, muhto amas sátni heivehuvvo sámegillii. Giellaprofessor *Ole Henrik Magga* dajai NRKii čakčamánuš diibmá, ahte olbmot olu johtileappot luoikkahit sániid amas gielain, nu mo enjelasgielas, čilget álkkes áššiid ovdalgo geavahit sámegielat sániid. Dát dahká ahte sámegiella šaddá *geafes giellan*.

Join geavahuvvo go áiggot searvat muhtin spillii neah- tas (omd. DOTA2 ja Starcraft2), ja dán sáhttá álkidit jorgalit sámegillii **searvat**, muhto dávjxit gullo, **joinet**. **Server** mearkkáša dihtor mii bálvala eará dihtoriid neahta bokte, danne sáhtašii dan gohčodit **dihtorbálvaleaddji** dahje dušše **bálva- leaddji**, muhto go das lea jo sámegielas semanttalaš oaivil, de sáhtášii omd. goalustit sániid bálvá ja dihtor, **bálvádihtor**. Giellagáhttejedđiide lea jeđđehus,

dás oaivvildan ahte sámegielas lea vejolaš sámáidahtit sániid ovdalgo luoikkahit amasgielain. Thor Frette rohkki dajai Sámeradios maŋnjá go almmustuhtii iežas sátnegirji ahte: *Dáppe leat olu sánit mat leat ráhkaduvvon ja dat galget gehčot evttohussan. Loahpalaččat lea sámi servvodat mii dohkkeha daid, dahje hilgu. Muhto almmá evttohusaid haga, de ii sáhte sámeservodat mai-dige mearridit.* (K. Kemi, njálmmálaš gáldu, 25.10.12). Thor Frette máddái čállia ahte ovdalgo njuolggaa dohpet amasgielat sáni, de lea vejolaš roggat boares sániid ja daidda addit odđa sisdoalu, dahje luoikkahit sániid eará sámegielain. Ovdamearkka dihte **chat**, mii dán ášsis mearkkaša elektrovnnalaččat čálašit, Njeazzegirjis/Facebook:as dahje Skype bokte, sáhtášii leat **bul-jardit** (Davvi Girji, 2000; 546), dahje **sålžat (solžat)** (Frette, 1975; 148).

Suorggideapmi ja goalosteapmi

Sátnesuorggideapmi lea vuohki mo ráhkadir odđa sániid oahpes sátnemáddagiin, nu mo omd. **čállit** sáni máddagis suorggida **-án** ja šaddá **čálán**, mii mearkkaša muhtin gii lea viššal čállit, muhto man odđa mearkkašupmi lea elektrovnnalaš čálli (Helander, 1994). *Nils Øivind Helander* čállá ahte juohke sátneluohkás sáhttá ráhkadir eará sátneluohká. Omd. substantiiva **guolli** ráhkaduvvo vearbasátnái **guolás-tit**. Ja dás sáhtát fas ráhkadir substantiivva **guolás-teapmi** (Helander, 1992). Thor Frette maiddái čilge ahte sámegielas lea iežas njuolggadusat. Dasto dadjá ahte sámegielas leat sullii 50 gehčosa maiguin sáhttá ráhkadir substantiivvaid (Frette, 1987: 75).]

Sátnegoalosteapmi lea erenoamáš vuohki sámegielas ja eará suoma-ugralaš gielain konstrueret odđa sisdoaluid.

Dát dáhpáhuvvá go guokte subjeakta goalostuvvoit oktii ja ráhkadir odđa semanttalaš oaivila. Omd. **e-mail**, šaddá **šleadgapoasta**. Šleadga mearkkaša **strøm, elektrisitet** (Sámi dáru sátnegirji, Davvi Girji, 2002; 532). Sátneheiveheamis livččii dát sátni doalahan originála hámi, muhto heivehuvvon sámegie-la sojahan paradigmii. **E-mail** doalahuvvo, ja ii oro erenoamáš, ovdalgo álgá sojahit sáni, omd. *mun sádde-jin dutnje e-maila, mun ozžon olu e-maila*. Jearaldat lea ahte galgá go čállit **e-meila** vai šaddá riekta sámi jienádat?

Sámegielas seammá go eará gielain, leat iežas njuolggadusat mo galgá heivehit sáni eatnigillii. Aikio ávžjuha vuhtii váldit erenoamážit sámegiela sátnedeattu go lea heiveheamen (Aikio 1994; 28). Vai lea dohkálaš heiveheapmi, de ii sáhte sáni álgodeaddu rievdat ja sáni loahppadeaddu heivehuvvo sámegillii, vai ii leat dár-bu eará go rievdadit loahpa. Sátnedeaddu gullo álgostávvalis. Guhkit sániin juohkása deaddu (Ibid). Sámegiella daddjo leat vearba-giella. Dat mearkkaša ahte sámegielas ráhkada nomenis vearbba. Dát sáhttá bukkit liige hástalusaid heivehit sáni amas gielas sámegillii. Prinsihpalaččat ii rievdda eangalasgielas sáni substantiiva- ja vearbahápmi, áidna mii rievda lea grammatihkalaš konteaksta (Francis Katamba, 2005; 64).

Siidaguoimmezielat báidnet sámegiela

Sámegiela geavaheaddjít ásset golmma davvirrikkas, ja Ruoššas. Guovtti davvi riikkain lea germánalašgiella riikkagiellan, ja ovttá riikkas fas suoma-ugralaš giella. 1978 dohkkehedje oktasáš davvisámi čállingiela. Váikko lea seamma sámegiella golmma riikkas, de gávdno-

> mun liikon dán girjji

> mun liikon dán girjjis

> mun liikon dán girjái

jit jo sánit ja grammatikhalaš konstrukšuvnnat mat eai leat ovttaláganat. Odđa sánit ráhkaduvvojit juohke riikkagiela málle mielde. Omd. Norgga bealde sámegielas lea **snøscooter** šaddan **muohtaskohter**, ja suomabealde fas **mohtorgielká**, mii suomagillii lea **moottorikelkka**. Maiddái riikkagiela laid grammatikhka váikkuha sámegielaid. Dábálaččat Norgga bealde dadjá *mun liikon dán girjji*, ja Suoma bealde gullu *mun liikon dán girjjis*. Riekta sámegielas livččii: *mun liikon dán girjái* (Vuolab-Lohi, 2007: 423–425). Go buohtastahttá dán guokte cealkaga de oaidná riikkagiela laid váikkuhusa sámegielas cealkkahuksemii. Ovdageažus dahje prefiksa maiddái sáhttá čujuhit giellabáidnimii. Sánis **umáhttu** orru *u* leamen ovdageažus boahztán amas gielas, danin go sámegillii livččii sáhttit dadjat **máhtuheapme**. Álgu sátneoassi *eahpe-* sáhttá maid tulkot ovdageažusin (prefiksa), danin go gávdno máŋgga sátneluohkás. Omd. eahpesku, eahpevuogigalaš, eahpelikhostuvvat (K. Kemi, njálmmálaš gáldu 25.10.12).

"**Davviriikkaid giellahistorjjá ferte oddasit cállit!**"

Davviriikkaid tradišuvnnalaš giellahistorjá čilge ahte omd. dárogiela rievdan áiggiid čáđa lea dáhpáhuvvan giela siskkáldas sivain, ja omd. sámegiella ii leat mo ge váikkuhan dárogiela rievdamii. Professor Tove Bull oaivvilda ahte dákkár giellahistorjjálaš áddejupmái lea sivvan dat go giellahistorjá lea čilgejuvvon *dáruiduhtiid čalbmeglásaguin*. Su váldu gáldun dán čuočuhussii lea ruoššalaš gielladutki *Jurij Kusmenko*, gii ovdamearkkaiguin čájeha ahte sámegiella lea dolin váikkuhan davvi-germánalaš gielaide. (Bull, 2010).

2008 almmuhuvvui stuorra girji tuiskagillii ráiddus *Berliner Beiträge zur Skandinavistik*. Cálli lea Jurij Kusmenko, professor emeritus Berlina Humboldt universitehtas, ja gii ain bargá gielladutkin, dál ee. St. Petersburggas Ruoššas. Professor Tove Bull oaivvilda ahte Kusmenko dutkan garrisit hástala davviriikkalaš gielladutkiid, ja vuordimis muhtimat fallehit Kusmenko oai-viliid bealuštettiin sajáduvvvan giellahistorjjá, ja earát fas nu mo son ieš, áigu fuomášahttit man mávssolaš giellahistorjjálaš dutkama Kusmenko duodaid lea alm-muhan.

Jurij Kusmenko dokumentere ahte sámegielas lea leamaš stuorát váikkuhus Skandinavia-gielaid go maid dán rádjai leat dutkit čilgen. Davvi-germánalaš gielladutkit leat oahppan ja oahpahit ahte sihke sámegiella ja suomagiella leat dolin luoikkahan olu sániid dološ oktasašskandinávalaš áiggis. Gielladutkit leat maid-dai oahppan ahte dát luoikkaheapmi lea dušše mannan ovtaa guvlui, skandinávalaš gielas suoma-ugralaš gielaide, ja iige nuppi guvlui. Dát ii leat nu, oaivvilda Kusmenko. Dolin oktasašskandinávalaš áiggis lei sámi servodat seamma dásis go davvi-germánalaš siida-guoibmeservodat. Dat mearkkaša sihke gielalaččat ja kultuvrralaččat. Gielat ja kultuvrrat mat lea seamma dásis, maiddái váikkuhit goabbat guoimmi gielaide seamma olu, oaivvilda Kusmenko (Bull, 2011). Maiddái historjjá ja arkeologalaš dutkamat čujuhit dasa ahte dološ áiggi servodatdilit ledje olu eambo symbiosalaččat ja seammadássásáččat. Arkeologa *Bjørnar Olsen* cállá omd. ahte dážat ja sámit, alla sosiála dásis náitaledje goappatguimmiideasetguin (Olsen, 2003; 25).

Kusmenkos leat olu argumeanttat mat čujuhit konkrehta váikkuhusaide. Tove Bull čilge ahte morfologalaš ja morfosyntávtalaš giellamearkkat mat ihte davvigermánalaš gielade gaskkal 6. ja 11. čuohtejagi, sáhttet leat boahktán sámegielas. Kusmenko namaha ahte sáni ovdageažus, dahje prefiksa, láhppo ja *suffigere-juvvon* artihkal ihtá (sátnái goalostuvvo artihkal mii mearrida dan sáni). Dasto čujuha Kusmenko muhtun fonologalaš ja fonehtalaš fenomenaide mat čuožžilit, ja galget seamma áigodagas leat boahktán sámegielas, omd. preaspirašuvdna. Dáid fenomenaid oaivvilda Tove Bull dárogiella lea ožzon sámegielas (Bull, 2011; 15-16).

Cealkkakonstrukšuvdna davvinorgga dárogielas sáhttá čujuhit eamboo váikkuhusaide sámegielas. Davvinorgga dárogielas gullo *ka du sir*, ja *æ blir ikke å komme*. Syntávtalaččat lea dát seammalágan go sámegielas. Dárogielas lea olu čavgasat sátnortnet go sámegielas (K. Kemi, njálmmálaš gáldu, 25.10.12). Dát maiddái sáhttá čujuhit dasa ahte sámegiella lea váikkuhan dárogillii, goit Davvinorgga dárogillii.

Loahppa

Universitehtalektor Kjell Kemi lei oahpaheaddjin kursas *Sámi giellageavahapeapmi* (Samisk språkpraksis) čakčat 2012. Sihke logaldallamiin, ja erenoamážit bargagadettiin dáinna artihkkaliin go hásten digaštallat olu áigeguovdilis čuolmmaid, ohppen erenoamáš olu. Ii leat várra dábálaš giitit oahpaheaddji almmolaččat, muhutto mun dagan dan dákkko bokte. Orun leat leamen olu velggolaš aiddo Kjellii.

Muhtin gáldut

- Bull, Tove (2010)**, "Annmeldelse", *Maal og minne*, hefte 2/2010: 156–189
- Bull, Tove (2011)**, "Samisk påverknad på norsk språk", *NOA, Norsk som andrespråk*, nr.1/2011: 5–32
- Frette, Thor (1987)**, "Gielladikšun – sániid ráhkadeapmi", *Sámás 3. Folkets brevkole – Norsk Korrespondanceskole – Utbildninggradion –Brevskolen*: 7–13
- Frette, Thor (1975)**, *Norsk-Samisk ordbok – Dáruigiel-sáme-giel sádnigirji*, Grunnskolerådet/gymnasrådet, Kirke- og undervisningsdepartementet, Universitetsforlaget
- Helander, Nils Øivind (1992)**, *Suorguideapmi. Muhtun Giellagažaldagat*, Vesa Gutterm, Nils Ø. Helander, Kjell Kemi (doaim.)
- Katamba, Francis (2005)**, *English words – structure, history, usage, building words*, second edition, New York, USA & Oxon, Canada, Routledge
- Minde, Henry (2003)**, "The challenges of Indigenism: The struggle for Sami Rights in Norway 1960–1990", Svein Jerntoft (doaim.) girjjis: *Indigenous Peoples: resource management and Global Rights*, Delft: Eburon Delft
- Olsen, Bjørnar (2003)**, "Belligerent chieftains and Oppressed hunters? Changig conceptions of Interethnic relationships in Northern Norway during the iron age and the early medieval period", James H. Barrett (doaim.) girjjis: *Contact, Continuity, and collapse: the Norse colonization of the North Atlantic*, Turnhout, Belgium : Brepols Publisher
- Sammalahti, Pekka (1994)**, "Sátnegoallosteapmi ja čállin-vuohki", *Tearbmasymposia raporta, Čállit/Sámi Instituhtta/Sámi Giellalávdegoddí*, Diedut nr. 3: 35–43
- Vuolab-Lohi, Káre (2007)**, "Máilmomi alladeamos olmmoš – Sámegiela giellagáhttema májggalágan hástalusat", Jussi Ylikoski ja Ante Aikio (Doaim.) girjjis: *Suomalais-ugrilaisen Seuran toimituksi, Riepmočála Pekka Sammallahти*, Helsinki : 423–429





Guovdageainnu girku mii huksejuvvui 1701.

Garra-Jorta – Guovdageainnu báhppa 1774–1780

Ovdal 1751 lei Guovdageainnu siida Ruota vuollásáš. Dan lagi riikkaráđji mearriduvvui lulli, julevu ja davvi-sámi čađa gitta nuortasámi duohkái. Nu Guovdageaid-nu šattai Dánmárku-Norgga hálđui.

Ruota bealde lei mišondoaibma beavttálmuvvan 1700-logu álgogeahčen. Dan olis viidánedje girkohuk-semat davásguvlui, ja lagi 1701 huksejuvvujedje girkut Guovdageidnui ja Ohcejohkii ja sárdnestobóš Ávjo-várrái.

Sihke Ruotas ja Dánmárku-Norggas sámemišuvdna doaimmai pietismma vuoinjnas. Sámiid sieluid vuittii kristtalašvuhtii go lágidii bassi čállosiid sámegillii ja oahpahii ja sárdnidii sámegillii.

Pietismma áigodat bisttii 1700-logu lohppii. Dan rá- jes čuvgehusáigodat ja *rationalisma* ráđđegođii miš-

šuvdna- ja oahpahuspolitikhka Sámis. Dánmárku-Norgga bealde girkoeiseválddit vuostálastigohte sámegiela geavaheami miššon- ja čuvgehusbargguin.

THOMAS VON WESTEN – "SÁMIID APOS-TAL"

Dánmárku-Norgga bealde nammaduvvui 1700-logu álggus Thomas von Westen sámi oaivámužžan miššonbargui, man stivrii Miššonkollegium Københápmanis. von Westen ásaħii miššonbiriid gitta Várjjaga rádjái, hukseħii skuvlavisožiid, sárdnestobožiid ja girkuid ee. Unjárgii, Detnui, Davvesiiddi ja Mázii. Son álgga-hii miššonskuvlla, *Seminarium scholasticum*, mii galggai oahpahit miššonbargiid geat sáhtte johtit Sámis ja oahpahit ja sárdnidit sámegillii. Troandima bisma *Peder Krogh* vuostálasttii von Westena giellapolitikhka, ja son geahčalii dáruiduhttit oahpahusa ja sártniid von Westen jápmima (1727) maŋjá.



Thomas von Westen.



Mišuneara Morten Lund (1686–1755) jorgalii Luther katekismusaš davvisámegillii. Dat almmus-tuvai 1728. Dat lei vissásit geavahusas Guovdageainnus dalle go Garra-Jorta barggai doppe báhppan.

SEMINARIUM LAPONICUM 1752–1774

Muhto Thomas von Westena giellaoaidnu vuittii fas 1740-logus, ja ođđa miššonnjuolggadusat deattuhedje sámegiela geavaheami čuvgehusbarggus. Ásahuvvui fas ođđa miššonskuvla, *Seminarium Lapponicum*, mii galggai oahpahit mišonbargiid ja doaimmahit bassicállagiid ja oahppogirjiid sámegillii. Dan jođiheaddjin nammaduvvui *Knud Leem*, gii lei bargan mišonbáhppan davvisámis ja-giid 1725–1734. Son barggai von Westena vuoinjas gitta dassái go jámii 1774:s.

Seamma jagi (1774) *Seminarium Lapponicum* heittihuvvui ja ođđa dáruiduhttinpolitikhka álggahuvvui. Dan jagi nammaduvvui dánskalaš Bang bisman, ja son gáibidii ahte buot sártnit ja oahpahus galge dáhpáhuvvat dárogillii, dahje rievtti mielde dánskkagillii.

GARRA-JORTA

Seamma jagi go *Seminarium Lapponicum* loahpahuvvui, álggii islándalaš Olav Josephsen Hjort (1740–1789) Guovdageainnu suohkana báhppan. Son lei lei leamaš miššonskuvlla *Seminarium Lapponicum* oahppi. Manjá son váldpii teologalaš dutkosa København fuones árvosániiguin. Jagi 1770 son nammaduvvui Porsáŋgu sámiid mišonbáhppan. Jagi 1774 son sirdojuvvui Guovdageidnui, gos son lei báhppan 1780 rádjái. Son jámii 1789:s.

Olav Josephsen Hjort gohčoduvvui Guovdageainnus *Garra-Jortan* danne go son nu garrisit vuostálastii pietistalaš oskulihkadusa mii lei vuolggahuvvon Durdnos-leagis ja viidánan maiddái Guovdageidnui. Dát osku-olbmot geat eatnašat ledje boazosápmelačcat, gohčoduvvojedje *Čuorvun* danne go sii čurvo gos ain, sihke girku lahka, šiljuin, viesuin ja iežaset boazosiiddain. Sii ávžuhedje olbmuid dahkat jorgalusa ja buorádusa.

Garra-Jorta ii liikon sidjiide álggage. Son oaguhii sin juohke sajis, huškui sin ja gilddii sin maiddái boahtimis girkui.

Garra-Jorta doarjjui ollásit dáruiduhtima, dahje rievtti mielde dánskkai duhtima. Son vuostálastii sámegiela geavaheami oahpahusas ja sártniin. Solža mielde son jođii maiddái sámi bearrašiid mielde ja ribadii sis sámegiel girjijiid.

Jens Andreas Friis (1821–1896), gii lei Oslo universitehta sáme- ja suomagiela professor, čálli girjji Lajla birra. Girjis govvituvvo Laagje ja Garra-Jortta hálešteapmi skuvlaviesus. Laagje lea boahátan viežzat Lajla ja Melleha. Son čipposta uksagurrii guldatit mánáid lohkama. Ozastis son rohtte boares sámegiel-dárogiel katekismusa vai beassá čuovvut oahppiid lohkama. Ii lean nu galle jagi áigi go guldalii go mánát oahpahuvvojedje sámegillii. Son muittašii man čábbát dat čuojai bealljái go lohke sámegillii. Muhto dát, maid dál lohke, gal čuzii issorasat su bealljái. Son doapma-la Garra-Jortta lusa. (Aage Solbakk heivehan sámás)



J. A. Friis Lajla-girjji olggoš, 1952.

- Gula, ráhkis báhppa! Eai got dus leat eambbo sámegiel girjxit maid sáhttit geavahit, nu go dákkára. Son rohttii ozastis girjis mii lei sisteseahkaža siste.
- Attes mat munnje dan geahčcat, láhttestii báhppa. Go Laagje geigii sutnje girjji, de son bidjalii dan beavddi ala.
- Mus eai leat eambbo dákkár girjxit, son dadjalii.
- Eai got boađe eambbo?
- Eai boađe. Dás duohko galggat don ja du mánát oahppat dárogiela.
- Manne galgá oahppat dárogiela? Mii leat duhtavaš gielaineamet.
- Danne go dárogiella lea buoret, riggásat ja ávkká-leabbo giella.
- Du giella lea fuones giella go ságastat bohccuid birra, duoddariid ja legiid birra, beaivvi čuovgga ja ija seavdnjadasa birra ja buot áššiid birra mat gullet min beaivválaš eallima dárbuide. Lea bat du giella riggásat? li de, du giella lea hui geafi midjiide.
- Ii leat dušše doarvái duhtadit beaivválaš dárbuid, dadjá báhppa. – It galgga vajálduhttit ahte don vuosttažettiin galggat jurddašit du iežat jápmem-

meahttun sielu dárbuidat ala.

- Na-a, don dajat duohtauoda, dadjá Laagje vuollegačcat. – Mii galgat vuosttažettiin jurddašit min jápmemeahttun siellomet ala.
- Dalle lea buoret ahte oahpat dárogiela ja logat dárogiela.
- Ii got Ipmeláhčči ádde buot gie-laid?
- De ádde, muhto don oahpat su buorebut dovdat ja sáhtát buorebut oažžut suinna oktavuoda dárogiela bokte.
- Lea go sámegiella nu fuones giella ahte Min Hearrámet ii viša gullat dan? jearrá Laagje ja muitá maid bisma Bang lei cealkán.
- Ii leat, muhto don sáhtát oažžut ollu dárogiel girjxit mat eai gávdno sámegillii. Don oaččut čuođi

dan sadjái go dán ovta.

- Manne ehpet atte midjiide eambbo?
- Danne go galgabehtet oahppat dárogiela nu ahte sáhttibehtet oažžut nu ollu go hálidéhpet.
- Báze dalle dearvan, láhttesta Laagje ja dáhttu girjis.
- Dá lea dutnje eará, stuorát ja buoret girji dárogillii, dadjá báhppa ja geige sutnje dan.
- In fuola dan, hálidian mu iežan girján.
- Váldde dán. Mun válldán du.
- In fuola du girjji. Atte munnje girján.
- Don it oaččo dan.
- In got oaččo dan! Báhppa, don suddudat. Don hálidat válđit mus mu ráhkis opmodagan. Don hálidat rievidit mus mu áidna dávvira mii lea mu ráhkkásemos man guottán ozastan gos dal jođežan, ja man anán eambbo árvvus go ellon. In guođe du viesu girján haga.
- Ipmlil namas, de bargga válđit dan ja mana olggos, báhppa suhtuin čurve.



Govvamuittut

Norgga bealde lei garra dáruiduhttinpolitihkka 1880 rájes 1960-logu rádjái. li lean lohpi geava- hit sámeigiela skuvllas. Jagi 1898 mearriduvvui ahte sámeigiela sáhtii geavhit dušše veahkke- giellan kristtalašvuoda oahpahusas Kárášjogas ja Guovdageainnus. Sullii seammalágan dilli lei Suoma ja Ruota bealde. Dá muhtun skuvla- govat davvi Sámis dán áigodagas.



Oahpaheaddji ja rivgu **Signe Haga** oahpa- heamen sámemánáid Mátta-Várjjagis 1880-logus. Dalle lei jo dáruiduhttinpoli- tihkka čavgan. Govva: *Ellisif Wessel*.

Dáža Lyder Aarseth (1886–1951), bodii oagpaheaddjin Guovdageidnui 1913:s. Dá oahpa-heamen. *Noras govvaarkiiva.*



Sarvvesvuona (Kolvik) skuvlamánát govejuvvon 1933:s.
Mearrasámi skuvlamánát gale
šadde gillát garra dáruiduhttima.
Noras govvaarkiiva.






Ruoča stáhta huksehii goahteskuvllaaid amaset boazodoalu mánát gáidat sámi duottareallimis. Dá muhtun goahteskuvllas Čohkkirasas, govvejuvvon 1939:s. Dálueamit ja oahpaheaddji Ingrid Gaup duogábealde. Govva: Borg Mesch.

Máret-Hánsa – Hans Baukop (1889–1963), Buolbmága skuvlamánáiguin ávvudeamen miessemánu 17. beaivve 1937:s. Olgeš ravddas oahpaheaddji Ola Aarseth. *Noras govvaarkiiva.*





Skuvlaoahppi rehkenasti-min govvejuvvon 1939:s.
Govva: Manker.

Guovdageainnu skuvlamánát
govvejuvvon 1950-logus. Gávttit bad-jelis. Govva: Romssa Museum.





Guovdageainnu skuvlamánát dalá
maŋjá soađi. Rivgu oahpaheamen.

Guovdageainnu skuvlastivračoahkkin Mázes
1954:s. Digaštalle go son sámegiela dili oahpahusas?
Edel Hætta Eriksen gurut ravddas. *Govva girjjis: Mui-*
talusat ja dáhpáhusat Guovdageainnus 8.





Kárásjoga internáhtta 1950. Internáhttat ledje deatalaččat dáruiduhttima várás. Dáppé mánát galge oahppat dáža dábiid ja árvvuid maid eiseválddit oaivvildedje váilo sámi servodagas. *Noras govvaarkiiva.*

Guovdageainnu oahppi **Rihtta-Nilut Ole Heikká Ristiinná – Ánne Ristiinná Hætta** cállimin, sámi gákti ja gahpir badjelis. Dadjat buot oahppiin lei dan áigge vierrun geavahit sámi gárvvuid skuvllas. De álge dáža oskusearvvit skeančkut dáža biktasiid skuvlamánáide ja nu heite geavaheames sámegárvvuid skuvlla vácce-dettiin, muitala Ánne Ristiinná. Govva: Priváhta.





Stáhta ruovttufidnoskuvla álggahuvvui
Guovdageidnui 1952:s. Skuvlla oahppit
govvejuvvon 1950-logu loahpas. Noras
govvaarkiiva.

"Johan Anders Anti ii leat stuoris, muhto son lohká dego almmái", čuožu čállojuvvon dán gova
birra, mii lea vižžojuvvon Aktuell vahkkobláđis
boazosámiid mánáid birra Kárájogas 1950:s.



JOHAN TURI

golmma gillii




Min bok om samene

ISBN 978-82-8263-062-7

192 s. NOK 395,-

Dingo dás | Bestill her
www.lagadus.org


Dahje jeara girjegávppis! |
Eller spør hos din bokhandel!



Muitalus sámiid birra

ISBN 978-82-8263-019-1 ISSN 1891-4519

198 s. NOK 395,-



An Account of the Sámi

ISBN 978-82-8263-063-4

221 s. NOK 395,-

MUN IN GILLE LOHKAT

MU SEANGGA GUORAS lávii ovdal oalle dávjá fieradit muhtunlágan girji. Ja hui dávjá ledje dat dakkár girjjit maid ledjen oastán girdihámmaniin daid háviid go lei ihána buorre dilli go vuorddašin girdiid. Ja dat girjjit sáhtte gal maid oalle guhká fieradit das seangga guoras, muhto man nu ládje de lávejin goit muhtun ládje geargat lohkamis daid.

DÁL LEA OALLE guhkes áigi go mus lea leamaš mak-kárge lohkamuš das seangga guoras, ja dat lea danne go lean nu hirbmat láiki šaddan. Ja de ferten mualit **movt** mun lean láikon.

GIRJJI II SÁHTE "scroll". Amma ipmirdehpet? Nie joðánit bláðet, nu movt dihtoris dahká go lea lohkame juoidá interneahtas. Ja nu lea ge. Danne mun in loga, go dat lohkan lea šaddan hirbmat áddjás doaibma.

JA GIRJJIIN ÁDJÁNA ge nu jalla guhká ovdal dainna geargá. Dasa lea ollu čállojuvvon, ja dasa lassin de fer te álo bláðestit vai oaidná movt de joatkašuvvá dat čálus. Diesa mun in hálit ge šat bidjat áiggi. Nu ahte dat maid dán áigge logan, leat áviisačállosat dahje bláðiin diet noveallat. Dat leat gal čállon oalle smáva bustávaiguin, muhto buot lea goit das seamma siiddus, nu ahte oainnán loahpa ovdal ollen dohko.

MUN MUITTÁN BURES manne oastigohten dieid girdihámmangirjiid. Mángii lávejin mun dat manjemus gii manan girdái, ja de lávejedje guorranan diet nuvttáaviisahildut. Nu mun de gárten lohkat dien "on board" bláði oalle mángii, ja de dihten measta bajil buot mii dasa lei čállojuvvon. De lei mihá buoret ahte mus lei girji man sáhtten lohkat, das goit juobe juoga oðða dáhpáhuvvá.

IN DIEÐE MII leaš dan čállon sánis, muhto mun nu hirbmadir váibban maid dainna lohkamiin. Dalle go stu-deanta ledjen, de lei earenoamážit okta pedagogikhkagirji mii dagahii ahte nahkárat rohttejedje ovttatmano. Diet girji lei lihkus pensumlisttus buot golbma jagi, ja de dan manjemus jagi mun de loahpas nagodin dan lohkat nu ahte in ribahan nohkkat logadettiin.

JA DE EASKA fuomášin man miellagiddevaš dat girji duoðai lei. Orui measta suddu ahte ledjen golbma jagi ádjánan dan lohkat pearpmas perbmii.

MUHTO DE GULLUI rádios illusáhka! Elle Márjá Vars lea jurddašan mu ja earáid birra. Mii geat leat láikkit lohkat, ja sii geat eai leat nu čeahpit lohkat sáhttit liikká oahpásmuvvat Elle Márjá girjjiid sisdollui, go dál son áigu daid almmuhit jietnagirjin. Mun nai beasan de

viimmat diehitit mii dat lea diet čábbámus iđitguovssu, go iežan láikodagain gal guhkkin eret lean gillen lohkat sámegiel girjiid. Sámegielas han leat nu jalla guhkes sánit, ja vaikko man ollu sojahanvuogit mat dahket oalle lossadin dan lohkama. Mu mielas goit lea nu.

DANNE LEA GE várra buoret ahte son gii lea čállán daid guhkes sániid dan assás girjái, ieš daid baicca lohká munne. Áidna mas mun dál balan, lea ahte ribahan oba mángii nohkkat go guldališgoadán Elle Márjjá jietnagirjiid. Go sus han lea nu fiinna litna lohkanjetna ahte balan dan munne váikkuhit seammaládje go muhtun čáppa buorre idjalávlla. Ja nu gal ii galggaše dáhpáhuvvat, go de han mun ádjánan dainna jietnagirjiin seamma guhká go dieinna pedagogihkkagirjjiin. Muhto buoret lea dohpet Elle Márjjá fárrui girdimátkái go muhtun girdihámmangirjji. Jietnagirji han lea nu unni ja geahpas ahte čáhká buksalummaide.

DÁL DE LEA mearriduvvon! Mu boahtte mátkeguobi lea Elle Márjá Vars. Buoret gullat su lohkama go girdijuma ja amas olbmuid mánáid čierruma. Ja jus dette ribahan nohkestit, de jáhkán Elle Márjjá munne hui álkit addit ándagassii, ja ahte lohkagoahtá álggu rájes fas dan girjji munne.



Sámi historjágirjjit

maid sámi spesialistat leat čállán!




AAGE SOLBAKK

Sámit áiggiid čađa 1

Historjjá- ja servodatfága oahppogirji – J2/J3

ISBN: 978-82-8263-041-2

305 s. NOK 350,-



HARALD GASKI & AAGE SOLBAKK

Sámit áiggiid čađa 2

Historjjá- ja servodatfága oahppogirji – J2/J3

ISBN: 978-82-8263-042-9

260 s NOK 350,-

Dingo dás! | Bestill her! **www.lagadus.org**
Dahje jeara girjegávppis! | Eller spør hos din bokhandel!